

ዮሀንሳ ቆንጮሳ ጋላ ቆፋ

ዮሀንሳ ቆንጮሳይ ፃፊቲዳይ፣ አማኒያ አሳይ ዩሱስ ኪሪስቶስ ባንታው ጎዳ ኦሊዲ፣ ጌሻቴላን ዳዒዳ ጊሾ ኤንታ ማቶይኔ ዋይይ ጋኪዳ ዋይይ። ፃፊይ ወዲዲ ጌሊዳ አይፌ ቆፋይ፣ አማኒያ አሳ ኡፋይሳይ ኩሜሊ ጊዳና ሜላ ኤንታ ሚንሌሊድ፣ ኤንታ ጋኪዳ ጎዳኔ ሜቱዋ ጊደን ባንታ አማኑዋን ሚኒዲ ኤቃና ሜላ ዳንሌላናሳ።

ማፃፋን ዳሪያ ኪፊሌይ ዳሮኔ ካሊ ካሊዲ ቆንጪዳ ቆንጮሳ ኦይኬስ። ሃ ቆንጮሳቲ ሄ ዋዴ ዳዒያ አሳስ ጌሌስ፣ ሺን ሃራታስ ፀራ ጊዲዲ ጋሞዒስ። ኤንቲ ኦዴቲዳይካ ሌሚሶ ኦዳና። ሃ ማፃፋን ዳዒያ ታይቦቲ፣ ማካ ሚሹቲኔ ደዓቲ ዳሬታኔ አያና ሜዴቲላታ ሌሚሶ። ማዘሙራ አዘማቹይ ሲሚ ሲሚዲ ዩፀቴይሳዳ፣ ሄ ማፃፋን ዳዒያ ሁዔ ቆፋቲ ዲማ ዲማ ቆንጮሳታ ባጋራ ዲማ ዲማ ኦጌን ሲሚ ሲሚ ሸቂዶሶና። ሃ ማፃፋ ቢርሼላስ ዲማ ዲማ ቆፋይ ዳዒኮካ፣ ኢያው ሁዔ ቆፋይ ቆንጮ። ሄሲካ፣ «ፆሳይ ጎዳ ኪሪስቶስ ባጋራ ዛሬሶና ኦጌን ባ ሞርኬታ፣ ፃላሄራ ጉጂዲ፣ ኢሲ ቶሆኔ ወርሴሊ ጋካናው ያናና። ሄ ያኑዋፔ ጉዬ፣ ኢያው አማኔቲዲ ዳዒዳ ባ ባጋታ ኦራላ ሳሎኔ ኦራላ ሳዓ አንጀ ላቲሳና» ያጌይሳ።

ዮሀንሳ ቆንጮሳ አይፌ ቆፋታ

- ጌሎ ቆፋ 1:1-8
- ዩሱሲ ላፑን ዋሳ ኬላታ ጊደን 1:9-20
- ላፑን ዋሳ ኬላታስ ፃፊቲዳ ኪታ 2:1-3:22
- ኦራታ፣ ፃላ ማፃፋኔ ዶርሳ 4:1-5:14
- ላፑን ማታሚታ 6:1-8:1
- ላፑን ሞይዜታ 8:2-11:19
- ዳዒያኔ ናሞዑ ደዓታ 12:1-13:18
- ዲማ ዲማ ቆንጮሳታ 14:1-15:8
- ላፑን ሃንቆ ፀዓታ 16:1-21
- ባቢሎኔ ኩንዳላ፣ ደዓኔ ዋርዶ ናቢያ 17:1-20:10
- ወርሴላ ፐርዳ 20:11-15
- ኦራላ ሳሎ፣ ኦራላ ሳዓኔ ኦራላ ዩሩሳላሜ 21:1-22:5
- ኩሻ ቆፋ 22:6-21

1 ኤሱን ሃናናው ዳዲያባ ባ አይሌታ ቤሳና ሜላ ያሳይ ኢያው ኢሚዳ ዩሱስ ኪሪስቶስ ቆንጮጽ ሃይሳ። ዩሱሲ ባ ኪታንቸዋ ከቲዲ፣ ባ አይሌያ ዮሀንሳስ ቆንጮሲስ። 2 ዮሀንሲ ያሳ ኪታ፣ ዩሱስ ኪሪስቶሲ ኦሊዳባኔ ኦዲዳባ ኡባ ማርካቲስ። 3 ሃ ኡባይ ሃናናው ዋዴይ ማቲዳ ጊሾ ሃ ቲንቢቲ ቃላ ናባቢያ ኦኒካ ኦንጃቲዳይሳ፤ ቃሲ ሃ ቃላ ሲዔይሳቲኔ ፃፊቲዳ ኪታ ናጊያ ኡባይ ኦንጃቲዳይሳታ።

ላፑን ኢሲያ ዋሳ ኬላታስ ኪቲቲዳ ሳርሶ

4-5 ሃ ዳብዳቤይ፣ ዮሀንሳ፣ ኢሲያ ቢታን ዳዲያ ላፑን ዋሳ ኬላታስ ፃፊቲስ። ካሴካ፣ ሃዲካ ዳዲያ፣ ሲንላፊካ ያናው ዳዲያ ያሳፊ፣ ቃሲ ኢያ ኦሪታ ሲንላን ዳዲያ ላፑን ኦያናታ፣ ሄሳዳካ፣ ሃይቆፔ ዳንደን ኮይሮ ጊዲዳይሳፊ፣ ሳባ ካዋታ ሃሪያ ኦማኔቲያ ማርካ ጊዲዳ ዩሱስ ኪሪስቶስ፣ ኦጾ ኬሃቲላይኔ ሳርቲላይ ሂንቲው ጊድ።

ዩሱሲ ኑና ሲቄስ፣ ቃሲ ባ ሱላን ናጋራ አይሌቲላፊ ኑና ላባ ኬሲስ። 6 ኑኒ ያሳ ኢያ ኦዋስ ኦላና ሜላ ኑና ካዋቲላ ካሂኔ ኦሊስ። ኢያው ሜሪናፔ ሜሪና ጋካናው ቦንቾይኔ ዋልቃይ ጊድ። ኦሚንዲ።

7 ሄኮ፣ ዩሱሲ ሻራራ ዩስ። ኦሳ ኡባይ ሃሪ ኦቶሺን፣ ኢያ ጫዲዳ ኦሳይካ ኢያ ቤባና። ሳባን ዳዲያ ኦሳ ኡባይ ኢያ ጊሾ ዩካና። ሄሲ ቱማ ሃናና! ኦሚንዲ።

8 «ካሴካ፣ ሃዲካ ዳዲያሲ፣ ሲንላፊካ ያና ጎዳይ፣ ኡባፊ ዋልቃማ ያሳይ፣ ኦላፋኔ ኦሚጊ ታና» * ያጌስ ጎዳ ያሳይ።

ጎዳ ቆንጮጽ

9 ታኒ፣ ዮሀንሲ፣ ሂንቲ ኢሻይ፣ ሂንቲራ ኢሲፊ ዩሱሳን ዋያ፣ ኢያ ካዋቲላኔ ኢያ ዳንዳባ ቤባስ። ታኒ ያሳ ቃላ ጊሾኔ ዩሱሳባ ማርካቲዳ ጊሾ ፓጂዋ ጊያ ሃላን ቲቄቲዳ ቢታን ዳዲያስ። 10 ጎዳ ጋላሳን ታ ጌሻ ኦያናን ሃሪታዳ ዳዲያስ፤ ታፔ ጉዩራ ዋይዜ ፑና ሜላ ጊታ ጊርሲ ሲባስ። 11 ሄ ጊርሳይ ታና፣ «ኔ ቤዔይሳ ማፃፋን ፃፋዳ፣ ኢሲያን ዳዲያ ላፑን ዋሳ ኬላታስ፣ ኤፊሶና፣

1:4-5 ኬሳ 3:14፤ ዮ.ቆ 4:5 1:4-5 ኢሳ 55:4፤ ማዝ 89:27 1:6 ኬሳ 19:6፤ ዮ.ቆ 5:10 1:7 ዳኔ 7:13፤ ማቶ 24:30፤ ማር 13:26፤ ሉቃ 21:27፤ 1ቴሴ 4:17፤ ዛካ 12:10፤ ዮሃ 19:34 * 1:8 ኦላፋኔ ኦሚጊ፣ ጋሪኬ ደናን ኦላፋኔ ኦሚጊ ኮይሮኔ ወርሴላ ፒዳሌታ፤ ቢርሼላይካ ኮይሮኔ ወርሴላ ጉሱ። 1:8 ዮ.ቆ 22:13፤ ኬሳ 3:14

ሳሚርኔሳ፣ ጰርጋሞና፣ ቲያቲርና፣ ሳርዳሳ፣ ፊላዳልፊያኔ ሎዶቂያ ዬዳ» ያገሰ።

12 ታኒ ታው ኦዲያ ገርሳ በዓናው ጉዬ ሲማዳ ያምፔ ዋሊያ ላፑን ዋርቃ ኮጫታ በዓሰ። 13 ሄ ኮጫታ ገደን አሳ ናዓ ዳኔይሳ በዓሰ። ኢ አዲሳ አፊላ ባ ቶሁዋ ጋሊ ማዒሰ፣ ዋርቃ ዳንጮን ባ ቲራ ዳንጪሰ። 14 ኢያ ሁዔይኔ ኢያ ቢናናይ ቦላ ዶርሳ ኢኪሴ ማላ ዋይኮ ሻቻ ማላ ቦሊ፤ ኢያ አይፊይ ታማ ላጮ ዳኔሰ። 15 ኢያ ቶሆይ ታማን ሴሪዲ ዘዒዳ ናሴ ቢራታ ዳኔሰ፤ ኢያ ገርሳይካ ገታ ሻፋ ኮሽንቻ ማላ። 16 ኢ ባ ኡሻቻ ኮሼን ላፑን ያለንቶታ ኦይኪሰ። ኢያ ዶናፔ ናምዑ ባጋራ ቃራቲዳ ማሺ ኬዬሰ። ኢያ ሶምዖይ ሴታ ጋላሳ አዋ አይፊ ዳኔሰ።

17 ታኒ ኢያ በዒዳ ዋዳ ሃይቂዳ አሳዳ ሃናዳ ኢያ ቶሁዋ ማታን ኮንዳሰ። ኢ ባ ኡሻቻ ኮሺያ ታ ቦላ ዋሊዲ፣ «ያዮፋ፤ ኮይርይ ወርሴላይ ታና። 18 ታኒ ዳዖን ዳዓይሰ፤ ታኒ ሃይቃሰ፣ ሺን ሄኮ ሜሪ ሜሪናወካ ዳዖን ዳዓይሰ። ሃይቆኔ ሲዖሌ ቁልፔይ ታ ኮሺና። 19 ሂዛ፣ ሃዒ ሃኒያባኔ ሲንላፊ ሃናናባ ኔ በዒዳባ ዓፋ። 20 ኔኒ ታ ኡሻቻ ኮሼን በዒዳ ላፑን ያለንቶታኔ ላፑን ዋርቃ ኮጫታ ቢርሽላይ ሃይሳ፣ ላፑን ያለንቶቲ ላፑን ዋሳ ኬላታ ኪታንቸታ፤ ላፑን ዋርቃ ኮጫቲ ላፑን ዋሳ ኬላታ።»

2

ኤፌሶና ዋሳ ኬላሰ ኪቴቲዳ ኪታ

1 «ኤፌሶና ዋሳ ኬላ ኪታንቸዋሰ ሃይሳዳ ያጋዳ ዓፋ።

ባ ኡሻቻ ኮሼን ላፑን ያለንቶታ ኦይኪዳይሰኔ ላፑን ዋርቃ ኮጫታ ገደራ ሃሙቴይሰ ሃይሳዳ ያገሰ። 2 ታኒ ኔ ኦሱዋ፣ ኔ ዳቡራኔ ኔ ጌንጫ ኤራይሰ። ኔኒ ኢታ አሳታባ ጌንጫናው ዳንዳባባናይሳ ኤራይሰ። ቃሲ ሃዋሬ ገደናሺን ባንታና፣ ሃዋሬ ጌይሳታ ፒልጋ ኤራዳ ኤንቲ ዋርዳንቸ ገደይሳ ዳሚዳይሳ ታ ኤራይሰ። 3 ኔኒ ጌንጫዳሳ፤ ታ ሱንላ ገሾ ማቶ ዳንዳዳዳሳ፤ ያኔታባካ። 4 ገደሺን፣ ሃዒ ታ ኔና ቦሪያባይ ዳዔሰ፤ ሄሲካ ኔኒ ካሴ ኔ ሲቁዋ አጋዳሳ። 5 ሂዛ፣ ኔ አይ ማላ ቶቃ ቤሳፊ ኮንዲዳኮ አኬካ! ኔ ናጋራፔ ሲማ፤ ኔኒ ካሴ ኦሊያ ኦሱዋ ኦላ። ኔኒ ኔ ናጋራፔ ሲሞና ኢዲኮ፣ ኔ ያምፔ ዋሊያ ኮጫ ኢያ

1:13 ዳኔ 7:13፤ ዳኔ 10:5 1:14 ዳኔ 7:9 1:14 ዳኔ 10:6 1:15 ሂዛ 1:24፤ 43:2 1:17 ኢሳ 44:6፤ 48:12፤ ዮ.ቆ 2:8፤ 22:13

ቤሳፌ ኤካና። 6 ሃዲ ታ ኔና ናሺያ ኢሲባይ ዳዔስ፤ ታ ኢዲያ ኒቆላዌታ ኦሱዋ ኔካ ኢፃዳሳ።

7 ጌሻ ኣያናይ ዋሳ ኬላታሰ ጊያባ ሲባናው ሃይሊ ዳዒያ ኦኒካ ሲዎ። ያኒያ ኦኒካ ያሳ ጋናቲያን ዳዒያ ዳዎ ሚሴ ኣይፌፔ ማና ሚላ ማታ ኢማና።

ሳሚርኔሳ ዋሳ ኬላሰ ኪቲቲዳ ኪታ

8 «ሳሚርኔሳ ዋሳ ኬላ ኪታንቹዋሰ ሃይሳዳ ያጋዳ ዓፋ።

ኮይርይኔ ወርሴላይ፣ ሃይቁዳይሲኔ ሃይቆፔ ዳንዲዳይሲ ሃይሳዳ ያጌሰ።

9 ታኒ ኔ ዋያኔ ኔ ማንቆቲላ ኤራይሰ፤ ጊዳሺን ኔኒ ዳሬ። ኣይሁዳ ጊዳናሺን ባንታና ኣይሁዳ ጌይሳቲ ጫያ ጫሻ ታ ኤራይሰ። ሺን ኤንቲ ዓላሄ ማባራን ዳዎሶና። 10 ኔኒ ኤካናው ዳዒያ ዋያ ባቦፋ። ዓላሄይ ሂንቴፌ ኢሶታ ኢሶታ ፓጫናው ቃሾ ኬላን ዩጋና፤ ታሙ ጋላሰ ጋካናው ሂንቴ ዋዬታና። ሃይቃና ጋካናው ኣማኔቲዳይሳ ጊዳ፤ ታ ኔው ዳዎ ካላቻ ኢማና።

11 ጌሻ ኣያናይ ዋሳ ኬላታሰ ጊያባ ሲባናው ሃይሊ ዳዒያ ኦኒካ ሲዎ። ያኒያ ኦኒካ ናሞዓንሉ ሃይቆዋን ቆሄቴና።

ጴርጋሞና ዋሳ ኬላሰ ኪቲቲዳ ኪታ

12 «ጴርጋሞና ዋሳ ኬላ ኪታንቹዋሰ ሃይሳዳ ያጋዳ ዓፋ።

ናሞፀ ባጋራ ቃራቲዳ ማሺ ዳዔይሲ ሃይሳዳ ያጌሰ። 13 ታኒ ኔ ዳዒያ ቤሳ ኤራይሰ፤ ኔኒ ዓላሄ ኣራታይ ዳዒያ ቤሳን ዳዓሳ፤ ታ ሱንላ ሚንላ ናጋዳሳ። ሃሪ ኣቶሺን፣ ዓላሄይ ዳዒያ ሂንቴ ካታማን ሃይቆዳ ታው ኣማኔቲዳ ማርካይ፣ ኣንቲጳሲ፣ ዳዒያ ዋዴካ ኣማኑዋ ኣጋባካ።

14 ጊዳሺን፣ ታ ኔና ቦሪያ ጉላባቲ ዳዎሶና። ሄሲካ ኢሰራዔሌ ኣሳይ ኤቃሰ ያርሼቲዳ ካላ ሚዲ ቱናና ሜላኔ ላይማቲላ ናጋራ ኦላና ሜላ ባላቃ ታማርሲዳ ባላማ ቲሚርቲያ ኤኪዳ ኢሲ ኢሲ ኣሳቲ ኔራ ዳዎሶና። 15 ሄሳዳካ፣ ኒቆላዌታ ቲሚርቲያ ታማሪያ ኣሳቲ ኔራ ዳዎሶና። 16 ሄሳ ጊሾ፣ ኔኒ ኔ ናጋራፔ ሲማ። ሄሲ ሃናና ኢዲኮ፣ ታ ኔኮ ኤሌሳ ያዳ ሄ ኣሳታ ታ ደናፔ ኬያ ማሻን ኦላና።

2:7 ሜዴ 2:9፤ ዮ.ቆ 22:2፤ ሂዝ 28:13፤ 31:8 2:8 ኢሳ 44:6፤ 48:12፤
ዮ.ቆ 1:17፤ 22:13 2:11 ዮ.ቆ 20:14፤ 21:8 2:14 ታይ 22:5

17 ጌሻ አያናይ ዋሳ ከላታሰ ጊያባ ሲባናው ሃይሌ ዳዒያ ኦኒካ ሲዎ። ያኒያ ኦዳሰካ ቆሴተዲ ዳዒያ ማናፌ * አማና። ቃሲ ኤኪያ ኡራፔ ኣቲን ሃራ ኣሲ ኤርና ኦራላ ሱንላይ ፃፌተዳ ቦላ ሹቻ ታ ኢያው አማና።

ቲያቲርና ዋሳ ከላሰ ኪቴቲዳ ኪታ

18 «ቲያቲርና ዋሳ ከላ ኪታንቸዋሰ ሃይሳዳ ያጋዳ ፃፋ።
ታማ ለጮ ዳኒያ አይፌይ ዳዒይሲ፣ ቃሲ ታማን ሴሪዳ ናሴ ቢራታ ዳኒያ ቶሆይ ዳዒይሲ፣ ያሳ ናዓይ፣ ሃይሳዳ ያጌሰ።
19 ታኒ ኔ ኦሱዋ፣ ኔ ሰቁዋ፣ ኔ አማኑዋ፣ ኔ ኦሱዋኔ ኔ ጌንጫ ኤራይሰ። ኔኒ ኮይሮ ኦሌይሳፌ ሃዒ አላዳ ኦሌይሳካ ኤራይሰ።
20 ጊደሺን፣ ታ ኔና ቦሪያ ኢሲባይ ዳዒስ፤ ባና ናቤ ጊያ ማጨሲው፣ ኤልዛቤሎ፣ አይኮካ ጋባካ። ሄ ማጨሲያ ኤቃሰ ያርሼቲዳ ካላ ሚዲ ቱናናዳኔ ላይማታናዳ ኦላዳ ታ አይሌታ ባሌላሱ። 21 ኢያ ባ ናጋራፔ ሲማና ሚላ ታ ኢው ዋዴ አማሰ። ሺን ኢያ ሲማናው ኮያቡኩ። 22 ኤንቲ ኢ ባላ ኦጊያፔ ሲሞና ኢዲኮ፣ ታ ኢዮ ኢታ ሃርጌን ዩጋና፤ ኢራ ላይማቲይሳቲካ ኢታ ዋዩ ዋዩታና። 23 ታኒ ኢ ናይታ ዋዳና፤ ቃሲ ዋሳ ከላ ኡባይ ታ አሳ ቆፋኔ አሳ ዋዳና ኤራይሳ ጊዳይሳ ኤራና። ታ ኢሱዋሰ ኢሱዋሰ ሂንቴ ኦሱዋዳ ኦሱዋዳ አማና። 24 ሺን ቲያቲርናን ዳዒያ ሃራታ፣ ሄ ኢታ ቲሚርቲያ ኤኪቦናይሳታኔ፣ «ፃላሄ ጊታ ፀራ» ጌቴቲያ ሃ ቲሚርቲያ ታማሪቦና ሂንቴና ሃራ ዳዩ ቶሆ ቶሲኪ። 25 ጊደሺን፣ ታ ያና ጋካናው ሂንቴው ዳዒያባ ሚንሌ ናጊቴ።

26 ያኔይሳሲኔ ዉርሴሌ ጋካናው ታው ኪቴቲያ ኦዳሰካ ካዋቲላታ ሃራና ሚላ ማታ አማና።

27 «ኢ ኤንታ ቢራታ ፃሞዓን ሃራና፤
ሚቃ ሚሼዳካ ሚንጮራላና።»
ሄ ማታይ ታኒ ታ አዋፔ ኤኪዳ ማታ ሚላ። 28 ቃሲ ታ ኢያው ባካላ ያሊንቶ አማና። 29 ጌሻ አያናይ ዋሳ ከላታሰ ጊያባ ሲባናው ሃይሌ ዳዒያ ኦኒካ ሲዎ።

* 2:17 ማና፡ ኢሰራዒሌ አሳይ ባዘ ቢታን ሃሙቲያ ዋዴ ሳሎፔ ያሳይ ኤንታው አሚዳ ዳማ ካሌ ዋይኮ ኪታንቸ ካሌ። 2:17 ኬሳ 16:14 2:20 1ካዋ 16:31፤ 2ካዋ 9:22 2:23 ማዝ 7:9፤ ኤር 17:10፤ ማዝ 62:12 2:26 ማዝ 2:8-9

3

ሳርዴሳ ዋሳ ኬላስ ኪቴቲዳ ኪታ

1 «ሳርዴሳ ዋሳ ኬላ ኪታንቸዋሰ ሃይሳዳ ያጋዳ ዓፋ።

ላፑን ያሳ አያናታኔ ላፑን ያለንቸታ ኦይኪዳይሲ ሃይሳዳ ያጌሰ። ታኒ ኔ ኦሱዋ ኤራይሰ፤ አሲ ኔና ፓፃ ዴዔሰ ገኮካ፤ ኔ ሃይቃዳሳ። 2 ባርካ! ጉላ አተዳባኔ ሃይቃናው ማቲዳባ ማንላ። ኔ ኦሶይ ያሳ ሲንላን ፖሎ ገደናይሳ ዴማሰ። 3 ሃዛ፤ ኔ ኤኪዳባኔ ሲዒዳባ አኬካ፤ ናጋ፤ ኔ ናጋራፔ ሲማ። ኔኒ ባርኮና ኢዲኮ ታ ካይሶዳ ያና፤ ታ አይ ዋዴ ያኔኮ ኔ ኤራካ።

4 ሺን ባንታ ማዑዋ ቂታዮና ጉላ አሳቲ ሳርዴሳን ዴዖሶና። አንታው ቤሲያባ ገዲያ ገሾ ቦላ ማዖ ማዒዲ ታራ ሃውታና።

5 ያኒያ ኦኒካ ኤንታይሳዳ ቦላ ማዖ ማዓና። ታኒ ኢያ ሱንላ ዴዖ ማፃፋፔ ቁቸኬ። ታኒ ታ አዋ ሲንላኒኔ ኢያ ኪታንቸታ ሲንላን ኢ ታባ ገዴይሳ ማርካታና። 6 ጌሻ አያናይ ዋሳ ኬላታሰ ገያባ ሲዒያ ሃይሴ ዴዒያ ኦኒካ ሲዖ።

ፊላዴልፊያ ዋሳ ኬላስ ኪቴቲዳ ኪታ

7 «ፊላዴልፊያ ዋሳ ኬላ ኪታንቸዋሰ ሃይሳዳ ያጋዳ ዓፋ።

ጌሻይኔ ቱማንቸይ፣ ዳዊቲ ቁልፒያ ባ ኩሺን ኦይኪዳይሲ፣ ሃይሳዳ ያጌሰ። ኢ ጎርዲን ኦኒካ ዴያናው ዳንዳዔና፤ ቃሲ ኢ ደዪን ኦኒካ ጎርዳናው ዳንዳዔና። 8 ታኒ ኔ ኦሱዋ ኤራሰ፤ ሄኮ ታ ኔ ሲንላን ኦኒካ ጎርዳናው ዳንዳዮና ዴያ ፔንጌ ዋላሰ። ኔ ዋልቃይ ጉላ ገዲኮካ፣ ታ ቃላ ናጋዳሳ፤ ታና ካዳባካ።

9 አይሁዴ ገደናሺን ባንታና አይሁዴ ገያ ዋርደታኔ ዓላሄ ባጋታ ኔኮ ኤሃናኔ ኔ ሲንላን ጉልባቲሳና። ታ ኔና ዶሴይሳ ኤንታና ኤሪሳና። 10 ኔኒ፣ ጌንጫ) ጋዳ ታ ኪቲዳ ኪታ ናገዲ ገሾ ኩሜላ አላሚያ ፓጫናው ያ ዋዬ ዋዲያፔ ታኒ ኔና ናጋና።

11 ታኒ ኤሌሳዳ ያና፤ ኦኒካ ኔ ካላቻ ኤኮና ሜላ ኔው ዴዒያባ ማንላዳ አይካ። 12 ያኒዳይሳ ታ ያሳ ኬላን ቱሱ ኦላና፤ ኢ ያን ሜሪናው ዳና። ታኒ ታ ያሳ ሱንላኔ ታ ያሳ ካታማ ሱንላ ኢያ ቦላ ዓፋና፤ ኢያካ ታ ያሳ ማታፔ ዋዲያ ኦራላ ዬሩሳላሜ። ቃሲ ታ ታ ኦራላ ሱንላካ ኢ ቦላ ዓፋና። 13 ጌሻ አያናይ ዋሳ ኬላታሰ ገያባ ሲዒያ ሃይሴ ዴዒያ ኦኒካ ሲዖ።

ሎዶቂያ ዋሳ ኬላስ ኪቴቲዳ ኪታ

3:3 ማቶ 24:43 3:5 ኬሳ 32:32 3:7 ኢሳ 22:22፤ አዮ 12:14 3:9
ኢሳ 49:23፤ 60:14፤ ኢሳ 43:4 3:12 ዮ.ቆ 21:2፤ ኢሳ 62:2፤ 65:15

14 «ሎዶቂያ ዋሳ ኬላ ኪታንቹዋሰ ሃይሳዳ ያጋዳ ፃፋ።
 (አሚንዒ) ጊዲዳ አማኔቲዳ ቱማ ማርካይ፣ ያሳ ሜዴቱላ ሃራይሲ ሃይሳዳ ያገራ። 15 ታኒ ኔ ኦሱዋ ኡባ ኤራይሰ፤ ኔኒ ኢርፃ ዋይኮ ሚሻ ጊዳካ፤ ኔኒ ናምዓፌ ኢሱዋ ጊዲኮ ሎዎ! 16 ኔኒ ኢርፃ ዋይኮ ሚሻ ጊደናሺን ቦልዎ ጊዲያ ጊሾ ታ ኔና ታ ደናፔ ጩታና ሃናይሰ። 17 ሂዛ፣ ኔኒ፣ ታኒ ዲሬ፣ ሻሎራ ዳዓይሰ፣ ታው ኣይቢባይካ ፓጩቤና) ያጋሳ። ሺን ኔኒ ማቶታንቸ፣ ማንቆ፣ ቆቄኔ ካሎቲዳ ኣሲ ጊዳይሳ ኤራካ። 18 ሄሳ ጊሾ፣ ኔ ዲሬታናው ታማን ጌዪዳ ዋርቃ፣ ኔ ዬላ ካሉዋ ካማናው ቦላ ማዎኔ ሎይላ ፃላናው ማዲያ ኣይፌ ዳሌ ታፔ ሻማና ሜላ ኔና ዞራይሰ።
 19 ታ ደሴይሳ ሰራይሰኔ ሃንቃይሰ፤ ሂዛ ሚና፤ ኔ ናጋራፔ ሲማ። 20 ሄኮ፣ ታ ካሬን ኤቃዳ ፃጋይሰ። ኦኒካ ታ ፃሳ ሲዒዲ፣ ዉላ ዶዪኮ፣ ኢያኮ ጌላና፤ ኢያራ ኢሲፌ ካሊ ማና፤ ኦኒካ ታራ ኢሲፌ ማና።
 21 ታ ያናዳ ታ ኣዋራ ኢያ ኣራታን ኡቲዳይሳዳ ያኒዳይ ታራ ታ ኣራታን ኡታና ሜላ ማታ ኢማና። 22 ጌሻ ኣያናይ ዋሳ ኬላታሰ ጊያባ ሲዒያ ሃይሊ ዳዔይ ኦኒካ ሲዎ» ያገራ።

4

ሳሎን ዳዒያ ጎይኖ ዋጋ

1 ሃሳፌ ጉዬ፣ ታኒ ሳሎ ፃሊያ ዋዴ ዶይቲዳ ፔንጌ ቤዓሰ። ቃሲ ታ ካሴ ሲዒዳ ሞይዜ ገርሳ ሜላይ ታኮ፣ «ሃ ኬያ፤ ሃይሳፌ ጉዬ፣ ሃናናው ዳዒያባ ታ ኔና ቤሳና» ያገራ። 2 ሄ ዋዴ ታ ኣያናን ሃራታዳ ዳዓይሰ። ሄኮ፣ ሳሎዋን ኣራታ ቦላ ኢሶይ ኡቲዳይሳ ቤዓሰ። 3 ሄ ኡቲዳይሳ ማላይ ኢያሰጴዴኔ ሳርዲዮና ጊያ ኣልዎ ሹቻ ሜላ። ኢያ ኣራታ ዩሹዋን ኣልዎ ሹቹ ዳኒያ ዙላይ ዳዔሰ። 4 ሄ ኣራታ ዩሹዋን ላታማኔ ኦይዱ ኣራታቲ ዳዎሶና፤ ኤንታ ቦላ ቦላ ማዎ ማዒዲ፣ ሁዔን ዋርቃ ካላቻ ዋሊዳ ላታማኔ ኦይዱ ጨማቲ ኡቲዳሶና። 5 ኣራታፔ ዋልዓንሌ፣ ጉንሌኔ ዳሾይ ኬዬሰ። ኣራታ ሲንላን ላፑን ፖዒያ ያምፔቲ ዳዎሶና፤ ኤንቲ ላፑን ያሳ ኣያናታ። 6 ኣራታ ሲንላን ቢሪሌ ዳኒያ ጳሊያ ቡርጩኮ ኣባይ ዳዔሰ።

3:14 ለጫ 8:22 3:19 ለጫ 3:12፤ ኢብ 12:6 4:2 ሂዛ 1:26-28፤ 10:1 4:5 ኬሳ 19:16፤ ዮ.ቆ 1:4፤ ዮ.ቆ 8:5፤ 11:19፤ 16:18፤ ሂዛ 1:13፤ ዛካ 4:2 4:6 ሂዛ 1:22 4:6 ሂዛ 1:5-10፤ 10:14

ሲንሳራኔ ጉዬራ አይፊይ ዳዒያ ኦይዲ ዳዖራ ዳዒያ ማዴቴላተ ኣራታ ዩቩዋኒኔ ኣራታ ጊደን ዳዖሶና። 7 ኮይሮ ማዴቴላ ማዴይ ጋሞ ዳኔሰ፤ ናሞዓንላይ ቦሪ ዳኔሰ፤ ሄቫንላይ ኣሴ ዳኔሰ፤ ቃሲ ኦይዲንላይ ፒራዲያ ኣርጋንላ ዳኔሰ። 8 ኦይዲ ማዴቴላታ ኡባሰ ኡሱቱን ቄፊይ ዳዒሰ፤ ኤንታ ኣሳቴላ ኡባይ ኣይፊን ኩሚሰ። ኤንቲ ቃማኔ ጋላሰ ቃንፆና።

«ጌሻው፡ ጌሻው፡ ጌሻው፡

ጎዳው፡ ኡባፊ ዎልቃማ ፆሳው፡

ካሴካ፡ ሃዒካ ዳዒይሶ፡ ሲንሳፊ ያናይሶ»

ያጎሶና። 9 ሄ ማዴቴላቲ ኣራታን ኡቲዳይሳሲኔ ማሪናው ዳዒይሳሰ ሳባ፡ ቦንቸኔ ጋላታ ኢሚዳ ዎዴ 10 ላታማኔ ኦይዲ ጨማቲ ኣራታን ኡቲዳይሳኔ ማሪናው ዳዒይሳ ሲንሳን ጉፋኒዲ ጎይኒዶሶና፤ ባንታ ካላቻ ኣራታ ሲንሳን ዎሊዲ።

11 «ኑ ጎዳው፡ ኑ ፆሳው፡

ኔኒ ቦንቸ፡ ሳባኔ ዎልቃ ኤካናው ቤሳሳ።

ኔኒ ኡባ ማዴዳሳ፤

ኡባባይ ኔ ሼኒያዳ ሃኒሰ፡ ማዴቴሰ»

ያጊዶሶና።

5

ደርሳይ ፃላ ማፃፋ ዶዩስ

1 ሄሳፊ ጉዬ፡ ኣራታ ቦላ ኡቲዳይሳ ኡሻቻ ኩሼን ጊዶራኔ ካሬራ ፃፊቲዳ ላቸን ማታማን ጎርዴቲዳ ፃላ ማፃፋ ቤዓሰ።

2 ኢሲ ሚኖ ኪታንቸይ ባ ቃላ ቶቁ ኦሊዲ፡ «ማታሚያ ቢላናዉኔ ማፃፋ ዶያናው ቤሴይ ኦኔ?» ያጊዲ ኣዎጂሺን ቤዓሰ። 3 ሺን ሳሎን ጊዲን ሳዓን ዎይኮ ሳዓፔ ጋርሳን ጊዲን ሄ ፃላ ማፃፋ ቢላናዉኔ ጊዲዎ ቤዓናው ዳንዳዒይ ኦኒካ ቤንቲቤና። 4 ፃላ ማፃፋ ቢላናዉኔ ኢያ ጊዲዎ ቤዓናው ቤሲያ ኣሲ ዳዩዳ ጊሾ ታ ዳር ዩካሰ። 5 ያቲን፡ ጨማታፔ ኢሶይ ታኮ፡ «ዩኮፋ! ሄኮ፡ ዩሁዳ ዜሬሊ ጊዲያ ጋሞይ፡ ዳዋቲ ሺሻይ፡ ላቸን ማታማታ ቢላናዉኔ ማፃፋ ዶያናው ዳንዳዒሰ» ያጊሰ።

6 ሄሳፊ ጉዬ፡ ሹኬቲዳ ደርሳይ ኣራታሰ፡ ኦይዲ ዳዖን ዳዒያ ማዴቴላታሲኔ ጨማታሰ ጊደን፡ ኤቂዳይሳ ቤዓሰ። ኢያው ላቸን ካጨቲኔ ላቸን ኣይፊቲ ዳዖሶና። ሄሳቲ ሳዓ ኡባ ኪቲቲዳ ያሳ ላቸን ኣያናታ። 7 ሄ ደርሳይ ቢዲ፡ ኣራታ ቦላ ኡቲዳይሳ ኡሻቻ

4:8 ሃዝ 1:18፤ 10:12፤ ኢሳ 6:2 5:1 ሃዝ 2:9 5:5 ማዴ 49:9፤ ኢሳ 11:1 5:6 ኢሳ 53:7፤ ዛካ 4:10

ኩሼፔ ፃላ ማፃፋ ኤኪሰ። 8 ኢ ሄ ፃላ ማፃፋ ኤኪዳ ዋዴ ዴፃን ዴዒያ ኦይዱ ሜዴቴላቲኔ ላታማኔ ኦይዱ ጨማቲ ዶርሳ ሲንላን ኩንዲዶሶና። ኤንቲ ኢሶይ ኢሶይ ዲሊኔ ገሻታ ዋሳ ገዲዳ ኢፃኔይ ኩሚዳ ዋርቃ ሻቴ ኦይኪዶሶና። 9 ኤንቲ፡

«ፃላ ማፃፋ ኤካናው፡ ማታሚያ ቢላናው ኔው ቤሴሰ።

ኣይሰ ገኩ፡ ኔኒ ሹኬታዳሳ፤ ዜሬሊ ኡባፌ፡ ዲማ ዲማ ዶናፔ፡ ያራታፔ ካዋቲላታ ኡባፌ ኔ ሱላን ያሳሰ ዋዛዳሳ።

10 ኤንቲ ኢያ ያሳ ኣዋሰ ኦላና ሜላ ኤንታና ካሂኔ ካዋቲሊ ኦላዳሳ።

ኤንቲካ ቢታ ኡባ ሃራና» ያገዲ ኦራላ ማዘሙራ ዩዲዶሶና።

11 ታ ቤዒያ ዋዴ ሙኩሉ ቶሆ ሙኩሉኔ ታሙ ሙኩሉ ቶሆ ታሙ ሙኩሉ ገዲያ ኪታንቸታ ገርሳ ሲዓሰ። ኤንቲካ ኣራታ፡ ኦይዱ ዴፃን ዴዒያ ሜዴቴላታኔ፡ ጨማታ ዩሹዋን ኤቂዶሶና።

12 ሄ ኪታንቸቲ ዶቁ ገዳ ቃላን፡ «ሹኬቲዳ ዶርሳይ ዋልቃ፡ ዴሬቴሊ፡ ጨንጫቴሊኔ ሚኖቴሊ፡

ቦንቸ፡ ሳባኔ ጋላታ ኤካናው ቤሴሰ» ያገደሶና።

13 ሄሳፌ ጉዬ፡ ሳዓን፡ ሳሎን፡ ሳዓፔ ጋርሳኒኔ ኣባ ገደን ዴዒያ ሜዴቴሊ ኡባይ፡

«ኣራታ ቦላ ኡቲዳይሳሲኔ ዶርሳሰ፡ ጋላታይ፡ ቦንቸይ፡ ሳባይኔ ዋልቃይ

ሜሪ ሜሪናው ገደ» ያገዲ ዩዲሽን ሰዓሰ።

14 ኦይዱ ዴፃን ዴዒያ ሜዴቴላቲ፡ «ኣሚንዒ» ያገደሶና፤ ቃሲ ጨማቲ ጉፋኒዲ ጎይኒዶሶና።

6

ማታሚያ ዶይቴላ

5:8 ማዘ 141:2 5:9 ማዘ 33:3፤ 98:1፤ ኢሳ 42:10 5:10 ኬሳ 19:6፤ የ.ቆ 1:6 5:11 ዳኔ 7:10

1 ደርሳይ ላፑን ማታሚያ፣ ኢሱዋ ደዪሺን በዓለ። ቃሲ ኦይዲ ዴዎን ዴዒያ ሜዴቴላታ፣ ኢሶይ፣ ዳዳ ዴሾ ገርሳን፣ «ሃያ!» ያገሺን ሲዓለ። 2 ሄኮ ቦላ ፓራ በዓለ። ሄ ፓራ ቶጊዳሲ ደንጌ ኦይኪሲ፤ ኢያ ሁዔን ካላቺ ዴዔስ። ኢካ ያኒሼ ያናናው ኬዩስ።

3 ቃሲ ደርሳይ ናምዓንሉ ማታሚያ ደዪዳ ዎዴ ዴዎን ዴዒያ ናምዓንሉ ሜዴቴላይ፣ «ሃያ!» ያገሺን ሲዓለ። 4 ቃሲ ሃራ ሲሃ ዘዎ ፓሪ ኬዩስ። ሄ ፓራ ቶጊዳይሳሰ ሳዓፔ ሳር ቆይሳና ሜላኔ ኣሳይ ዎሊ ወርሳና ሜላ ማቲኔ ገታ ማሺ ኢሜቲስ።

5 ደርሳይ ሄቫንሉ ማታሚያ ደዪዳ ዎዴ ዴዎን ዴዒያ ሄቫንሉ ሜዴቴላይ፣ «ሃያ!» ያገሺን ሲዓለ። ሄኮ ካሬላ ፓራ በዓለ፤ ኢካ ባ ኩሺን ሚዛኔ ኦይኪሲ። 6 ኦይዲ ዴዎን ዴዒያ ሜዴቴላታ ገደፌ፣ «ኢሲ ጋላሳ ኦሶስ ዳሞዜ፣ ባጋ ኪሎ ገሰቲ፤ ቃሲ ኢሲ ጋላሳ ኦሶስ ዳሞዜ፣ ኢሲ ኪሎኔ ባጋ ባንጋ ገደ። ሺን ዛይቲያኔ ዎይኒያ ቆሆፓ» ያገሺን ሲዓለ።

7 ደርሳይ ኦይዳንሉ ማታሚያ ደዪዳ ዎዴ ኦይዳንሉ ዴዎን ዴዒያ ሜዴቴላይ፣ «ሃያ!» ያገሺን ሲዓለ። 8 ሄኮ ዎንጮ ፓራ በዓለ። ሄ ፓራ ቶጊዳይሳ ሱንላይ ሃይቆ፤ ኢያ ጌዶ ሲዎሎይ ካሌስ። ኤንታው ኣላሚፔ ኦይዳንሉ ኩሺያ ኦላን፣ ኮሻን፣ ጋዶኒኔ ደዓን ዎዲሳና ሜላ ማቲ ኢሜቲስ።

9 ደርሳይ ኢቻሻንሉ ማታሚያ ደዪዳ ዎዴ ኤንቲ ያሳ ቃላ ኦዲዳ ገሺኔ ባንታ ማርካቴላን ኣማኔቲዳ ገሾ ሹኬቲዳ ኣሳ ሺምፖታ ያርሾ በሳፌ ጋርሳን በዓለ። 10 ኤንቲ ባንታ ቃላ ቶቁ ኦሊዲ፣ «ኡባ ሃሪያ ጎዳው፣ ጌሻው፣ ቱማንቹዎው፣ ሳዓን ዴዒያ ኣሳ ቦላ ኔ ፐርዳናይኔ ኦ ሱላ ገሾ ሃሎ ኬያናይ ኣዉዴ?» ያገደሶና። 11 ኤንታ ኢሱዋሰ ኢሱዋሰ ቦላ ማዎይ ኢሜቲስ። ኤንታይሳዳ ሃኒዲ ሃይቃናው በሲያ ኤንታ ላጌታ ታይቦይ ኩማና ጋካናው ጉላ ዎዴ ሸምፓና ሜላ ኤንታው ኦዴቲስ።

12 ደርሳይ ኡሱፑንላ ማታሚያ ደዪዳ ዎዴ ታ በዓለ፤ ዎልቃማ ቢታ ቃዎይ ሃኒስ። ኣዎ ኣይፌይ ካሬዲዲ ካሌ ዳኒስ። ኣጌናይካ ዘዒዲ ሱሉ ዳኒስ። 13 ዎልቃማ ጫርኮይ ጫርኪዲ ባላሴ ሚላ ቃወዔ ኣይፊያ ቆቆፌይሳዳ ሳሉዎ ያለንቶቲ ሳዓን ቆቆፌቲደሶና።

14 ሳሎይ ፃላ ማፃፋዳ ፃፃቲዲ ኣዲስ፤ ዙማይኔ ኣባን ቴቲቲዳ ቢታቲ ባንታ በሳፌ ቆይደሶና። 15 ቢታ ካዎቲ፣ ዴሪያ

6:2 ዛካ 1:7 6:4 ዛካ 1:7 6:5 ዛካ 6:2 6:8 ሃዝ 14:21 6:12 የ.ቆ 11:13፤ 16:18፤ ኣሳ 13:10፤ ኤር 2:10 6:13 ኣሳ 34:4 6:14 የ.ቆ 16:20

ሃሪይሳት፣ ኦላ ካሌሌይሳት፣ ዱሪት፣ ዋልቃማት፣ አይሌት፣
 ዋማኖት ጎንጎሎኒኔ ዳሪያ ቦላ ዳዲያ ዛላ ሆምዖን ቆሴትደሶና።
 16 ኤንተካ ዙማኮኔ ዛላኮ፡ «ኑ ቦላ ዋጂቴ፤ ኑና ቆሴቴ፤ አራታን
 ኡትዳይሳ አይፊያፕኔ ዶርሳ ሃንቁዋፊ ኑና ገንሏቴ። 17 ሂዛ፣ ገታ
 ሃንቆ ጋላሳይ ጋኪሰ፤ ኦኔ ዳንዳዲ ኤቃናይ?» ያገደሶና።

7

144፡000 አሳታ ቦላ ማታሚይ ዋሴቲሰ

1 ሄሳፊ ጉዬ፣ ኦይዱ ኪታንቸት ኦይዱ ሳዓ ጋፃን ኤቁዳይሳታ
 ቤዓሰ። ሄ ኪታንቸት ሳዓ ቦላ ዋይኮ አባ ቦላ ዋይኮ አይ ሚላ
 ቦላ ጫርኮይ ኦይዱ ሳዓ ጋፃፕ ጫርኮና ሚላ ቲቁደሶና። 2 ቃሲ
 ዴዖ ያሳ ማታሚያ ኦይኪዳ ሃራ ኪታንቸይ ደሎሃ ባጋፊ ኬዬይሳ
 ቤዓሰ። ሄ ኪታንቸይ ባ ቃላ ጶቁ ኦላዲ፣ ሳዓኔ አባ ቆሃናው
 ዋልቁ አሚቲዳ ኦይዱ ኪታንቸታ፣ 3 ዪጊዲ፣ «ኑኒ ያሳ አይሌታ
 ሶምዖን ማታሚያ ዋላና ጋካናው ቢታ ዋይኮ አባ ዋይኮ ሚላ
 ቆሆፕቴ» ያገሰ።

4 ያቲን፣ ታኒ ያሳ ማታሚይ ሶምዖን ዋሴቲዳይሳታ ፓይዲዋ
 ሲዓሰ። ኢሰራዔሌ ማይዛታ ኡባፊ ዪታኔ ኦይታማኔ ኦይዱ
 ሙኩሉ አሳሰ ሶምዖን ማታሚ ዋሊሰ።

5 ዪሁዳ ዜሬላፊ ታማኔ ናምዑ ሙኩሉ፣

ሮቤላ ዜሬላፊ ታማኔ ናምዑ ሙኩሉ፣

ጋዴ ዜሬላፊ ታማኔ ናምዑ ሙኩሉ፣

6 አሴሬ ዜሬላፊ ታማኔ ናምዑ ሙኩሉ፣

ኒፍታሌሜ ዜሬላፊ ታማኔ ናምዑ ሙኩሉ፣

ሚናሴ ዜሬላፊ ታማኔ ናምዑ ሙኩሉ፣

7 ሲሞና ዜሬላፊ ታማኔ ናምዑ ሙኩሉ፤

ሌዌ ዜሬላፊ ታማኔ ናምዑ ሙኩሉ፣

ዪሳኩሬ ዜሬላፊ ታማኔ ናምዑ ሙኩሉ፣

8 ዛቢሎኔ ዜሬላፊ ታማኔ ናምዑ ሙኩሉ፣

ዮሴፋ ዜሬላፊ ታማኔ ናምዑ ሙኩሉ፣

ቢኒያሜ ዜሬላፊ ታማኔ ናምዑ ሙኩሉ፣

አሳ ሶምዖን ማታሚ ዋሊሰ።

ቦላ ማዖ ማዒዳ ዳር አሳታ

6:15 እሳ 2:19 6:16 ሆሴ 10:8፤ ሉቃ 23:30 6:17 ኤር 2:11፤ ሚላ
 3:2 7:1 ኤር 49:36፤ ዳኔ 7:2፤ ዛካ 6:5 7:3 ሂዛ 9:4

9 ሃሳፌ ጉዬ፣ ዜሬሊ ኡባፌ፣ ካዎቴላ ኡባፌ፣ ሦራ ኡባፌ፤ ዲማ ዲማ ደናፔ ዛዋ ባይና ደሮ አሳ ቤዓሰ። ሄ አሳይ ቦላ ማዎ ማዒዲ፣ ዛምባ ሃይሊ ባንታ ኩሼን ኦይኪዲ፣ አራታ ሲንሳኒ፤ ደርሳ ሲንሳን ኤቂደሶና። 10 ኤንቲ ባንታ ቃላ ጾቁ ኦሊዲ፣ «አቶቴላይ አራታን ኡቲዳ ኑ ያሳፌ፤ ደርሳፌ ዬሰ» ያጊደሶና።

11 ኪታንቸቲ ኡባይ፣ አራታ፣ ጨማታኔ ኦይዲ ሜጴቴላታ ዩሹዋን ኤቂደሶና። ኤንቲ አራታ ሲንሳን ጉፋኒዲ ያሳ ሳይኒደሶና።

12 «አሚንዒ!»

አንጆይ፣ ቦንቸይ፣ ጨንጫቴላይ፣ ጋላታይ፣ ሳባይ
ዎልቃይ፣ ሚኖቴላይ ሜሪ ሜሪናው
ኑ ያሳሰ ጊድ።

አሚንዒ!»
ያጊደሶና።

13 ጨማታፔ ኢሶይ ታኮ፣ «ሃ ቦላ ማዑዋ ማዒዳ አሳቲ ኦናንቲ? ኤንቲ አዉፔ ዩደና?» ያጊዲ ኦይቸሰ።

14 ታኒ ዛራዳ፣ «ጎዳው፣ ኔ ኤራሳ» ያጋሰ።

ኢካ ታኮ፣ «ሃይሳቲ ደሮ ዋዬ ዋዩዲ አጲዳይሳታ። ኤንቲ ባንታ ማዑዋ ደርሳ ሱላን ሜጨዲ ጌሺደሶና። 15 ሃሳ ጊሾ፣ ኤንቲ ያሳ አራታ ሲንሳን ጊዲዲ

ቃማኔ ጋለሰ ኢያ ኬላን ኦላሶና።
ቃሲ አራታ ቦላ ኡቲዳይሲ ኤንታው ኩያ ጊዳና።

16 ሃዘፔ ጉዬ፣ ኤንቲ ኮሻቶኮና፣ ሳሞቶኮና።

አዋ ዎይኮ ሚሺ ኤንታ ሜና።

17 አራታ ጊደን ኡቲዳ ደርሳይ ኤንታ ሄማና።

ዴዎ ፑልቶ ሃላኮ ኤንታ ካሌላና።

ያሳይ ኤንታ አይፊያፔ አፋላ ኡባ ቁቻና»
ያጊሰ።

8

ላፑንላ ማታሚይ ደዬቲሰ

1 ደርሳይ ላፑንላ ማታሚያ ደዩዳ ዎዴ ባጋ ሳቲ ጊዴይሳ ሜላ ሳሎይ ሲዒ ጊሰ።

2 ሃሳፌ ጉዬ፣ ታኒ ላፑን ሞይዜቲ ኢሜቲዳ ላፑን ኪታንቸታ ያሳ ሲንሳን ኤቂዳይሳታ ቤዓሰ።

7:14 ዳኔ 12:1፤ ማቶ 24:21፤ ማር 13:19 7:16 ኢሳ 49:10 7:17 ማዝ 23:1፤ ሂዝ 34:23፤ ማዝ 23:2፤ ኢሳ 49:10፤ ኢሳ 25:8

3 እጻኔ ጨዩሲያ ዋርቃ ሻቴ ኦይኪዳ ሃራ ኪታንቸይ ዩዲ፥ ያርሾ ቤሳ ማታን ኤቁስ። ኢ ኦራታ ሲንላን ዴዲያ ዋርቃ ያርሾ ቤሳ ቦላ ገሻታ ኡባ ዋሳራ ጉጂዲ ያርሻና ሜላ ኢያው ዳር ኢጻኔይ አሜተስ። 4 ኢጻኒያ ጨያይ ገሻታ ዋሳራ ኢሲፌ ኪታንቸዋ ኩሼፔ ፑዴ ያሳኮ ኮዩስ። 5 ሄሳፌ ጉዬ፥ ኪታንቸይ እጻኔ ጨዩሲያ ሻቲያ ኤኪዲ፥ ኢያን ያርሾ ቤሳፌ ቦንቆ ታማ ኩንሊዲ ሳዓ ዲጌ ሆሊስ። ያቲን ዴሾይ፥ ዋልዓንሊ፥ ገርሲኔ ቢታ ቃይይ ሃኒስ።

ላፑን ሞይዜታ

6 ሄሳፌ ጉዬ፥ ላፑን ኪታንቸቲ ባንታ ሞይዚያ ፑናናው ጊጌቲዶሶና።

7 ኮይር ኪታንቸይ ባ ሞይዚያ ፑኒያ ዋዴ ሻቸኔ ሱላራ ዋላኬቲዳ ታሚ ሳሎፔ ቡኪስ። ሳዓፔ ሲኮይ ፀጌቲስ፤ ሚላፌ ሲኮይ ፀጌቲስ፤ ጨልዖ ማታ ኡባይ ፀጌቲስ።

8 ናምዓንሉ ኪታንቸይ ባ ሞይዚያ ፑኒዳ ዋዴ ዋልቃማ ዴሪ ዳኒያባይ ታማን ኤደሼ ኣባን ዩጌቲስ። ያቲን፥ ኣባፌ ሲኮይ ሱሉ ጊዲስ። 9 ኣባን ዴዖን ዴዲያ ሜዴቴላፌ ሲኮይ ሃይቁስ፤ ማርካቤታፔ ሲኮይ ዳይስ።

10 ሄሻንሉ ኪታንቸይ ባ ሞይዚያ ፑኒዳ ዋዴ ያምፔዳ ኤዲያ ዋልቃማ ያለንቶይ ሻፋፔ ሲኩዋ ቦላኔ ፑልቶታ ቦላ ሳሎፔ ዋዲስ። 11 ሄ ያለንቱዋ ሱንላይ ጫሞ ጌቲቲስ። ሃላፌ ሲኩዋ ጫሚሲስ፤ ሃላይ ጫሚዳ ገሾ ዳር ኣሳይ ሄ ሃላ ኡዩዲ ሃይቁዶሶና።

12 ኦይዳንሉ ኪታንቸይ ባ ሞይዚያ ፑኒስ። ኣዋፔ፥ ኣጌናፔኔ ያለንቶታፔ ሲኩዋ ዳቸስ፤ ኤንታ ፖዑዋፔ ሲኮይ ዱሚስ። ጋላሳፔ ሲኮይ፥ ቃማፌካ ሲኮይ ዱሚስ።

13 ኢሲ ኣርጋንሊ ሳሎ ዶቁ ጊዲ፥ ፒራዲሺን ቤዓስ። ሄ ኣርጋንላይ ባ ቃላ ዶቁ ኦሊዲ፥ «ኣቲዳ ሄሹ ኪታንቸቲ ባንታ ሞይዚያ ፑናናው ዴዲያ ገሾ ሳዓን ዴዲያ ኣሳ ኣዬ! ኣዬ! ኣዬ!» ያጊሺን ሲዓስ።

8:5 ለዌ 16:12፤ ሂዝ 10:2፤ ኬሳ 19:16፤ ዮ.ቆ 11:19፤ 16:18 8:7 ኬሳ 9:23-25፤ ሂዝ 38:22 8:10 ኢሳ 14:12 8:11 ኤር 9:15 8:12 ኢሳ 13:10፤ ሂዝ 32:7፤ ኢዩ 2:10

9

1 ሃሳፌ ጉዬ፣ ኢቻሻንሉ ኪታንቸይ ባ ሞይዚያ ፑኒን ሳሎፔ ዲጌ ሳዓ ኩንዲዳ ያለንቶ ቤዓስ። ሄ ያለንቱዋስ ዋልቃማ ኦላ ቁልፔይ ኢሜቲስ። 2 ያለንቶይ ኦላ ዶዩዳ ዋዴ ዳልጋ ጮጮፔ ኬያ ጩያ ማላ ጩያይ ሄ ኦላፌ ኬዩስ። ሄ ኦላፌ ኬዩዳ ጩያን አዋይኔ ሳሎይ ቋሚዶሶና።

3 ሄ ጩያፔ ቦሌይ ኬዩዲ ሳዓን ዋዲስ። ሳዓን ዴዒያ ኮርኔታስ ዴዒያ ዋልቃ ማላ ዋልቂ ቦሌታስ ኢሜቲስ። 4 ያሳ ማታሚይ ሶምዖን ባይና አሳ ያላላፔ አቲን ሳዓን ዴዒያ ማታ ዋይኮ ማላ ዋይኮ አይ ጪልዖባ ጊዲን ቆሆና ማላ ቦሌታስ ኦዴቲስ።

5 ቦሌቲ አሳ ኢቻሹ አጌና ጋካናው ገፃ ካዓና ማላ ማቲ ኢሜቲስፔ አቲን አሳ ዋዳና ማላ ጊዴና። ኮርኔይ አሴ ዱኪን ዛሚይሳ ማላ ቦሌይ ዱኪዲ ዛሚሴስ። 6 ሄ ጋላሳታን አሳይ ሃይቆ ኮያና፣ ሺን ዴሚና። ኤንቲ ሃይቃናው አሞታና፣ ሺን ሃይቆይ ኤንታፌ ሃካና።

7 ቦሌይ ኦላስ ጊጊ ኡቲዳ ፓራ ዳኔስ። ቦሊያ ሁዔን ዋርቃ ካላቺ ዴዒስ፤ ኤንታ ሶምዖይካ አሳ ሶምዖ ዳኔስ። 8 ኢያ ቢናናይ ማጫሳ ቢናና ማላ አዱሴ። ኤንታ አቻይካ ጋሞ አቺ ዳኔስ።

9 ኤንታው ቲራ ቦላ ዋሊያ ቢራታ ፀሩሬይ ዴዒስ፤ ኤንታ ቁፊያ ጊርሳይ ኦሌታናው ጋላቢያ ፓራኔ ፓራ ጋሬ ጊርሳ ማላ።

10 ኤንታው ኮርኔ ጎይና ዳኒያ ጎይኒኔ ዱኪያ ዪሺ ዴዒስ። ሄ ጎይናን ኢቻሹ አጌና አሳ ቆሃና ማላ ማቲ ኢሜቲስ። 11 ኤንታና ሃሪያ ካዋይ ዴዒስ፤ ሄ ካዋይ ኦላ ኪታንቸዋ። ኢያ ሱንላይ ኢብራይስጳ ዶናን አብዶና፤ ቃሲ ጊሪኬ ዶናን አጶሊዮና ጌቴቲስ። ኢያ ሱንላ ቢርሼላይ «ዳይሴይሳ» ጉሱ።

12 ኮይሮ አዬይ አዲስ፤ ሄኮ፣ ቡሮ ሃራ ናሞዑ አዬቲ ኤሶን ሃናና።

13 ኡሱፑንላ ኪታንቸይ ባ ሞይዚያ ፑኒስ። ያሳ ሲንላን ኤቂዳ፣ ዋርቃ ያርሾ ቤሳን ዴዒያ ኦይዱ ካጩታፔ ኢሲ ጊርሲ ሲዓስ። 14 ሄ ጊርሳይ ሞይዜ ኦይኪዳ ኡሱፑንላ ኪታንቸዋኮ፣ «ኤፊራዒሴ ጊያ ጊታ ሻፋን ቃሹቲዳ ኦይዱ ኪታንቸታ ቢርሻ» ያጊስ። 15 ቢታ ቦላ ዴዒያ አሳፔ ሲኩዋ ዋዳና ማላ ሄ ሳቲያስ፣ ሄ ጋላሳስ፣ ሄ አጌናሴ ሄ ላይላስ ጊጊዲ ኡቲዳ ኦይዱ ኪታንቸቲ ቢርሼቲዶሶና። 16 ኦላ ፓራ ቶጊያ ኦላንቸታ ፓይዶይ ዳሮ ጭቲ ሚሎኔ ጊዴይሳ ሲዓስ።

9:2 ሜዴ 19:28 9:3 ኪሳ 10:12 9:4 ሃዝ 9:4 9:6 ኢዮ 3:21፤
ኤር 8:3 9:7 ኢዩ 2:4 9:8 ኢዩ 1:6 9:9 ኢዩ 2:5 9:13 ኪሳ
30:1

17 ቃሲ ታ ቆንጩላን ፓራታኔ ሄ ፓራታ ቶጊዳ አሳ ቤዓስ። ሄ አሳይ ቲራን ዋሊያ ቢራታ ፀረሬይ ታማ ቦንቆ ማላ ዘዎ፣ ያኪንቴ ማላ፣ ካራላ ካሎሴ ማላኔ ዲኔ ማላ ጨሊሎ። ፓራታ ሁዔይ ጋሞ ሁዔ ማላ፤ ኤንታ ደናፔ ታሚ፣ ጨዩኔ ዲኔይ ከዩስ።
 18 ፓራታ ደናፔ ከዩዳ ታማን፣ ጨያኒኔ ዲኒያን ሄ ሄዙ ጋዶታን ሳሳን ደዒያ አሳፔ ሲኮይ ሃይቁስ። 19 ሄ ፓራታ ዋልቃይ ኤንታ ደና ጊዶኒኔ ጎይናን ደዔስ። ኤንታ ጎይናይካ ሾሻ ሁዔ ማላ፤ ኤንቲ ኢያራ አሳ ቆሆሶና።

20 ሃ ጋዶታፔ አቲዳይሳቲ ባንታ ኩሼ ኦሱዋፔ ሲሚቦኮና። ኤንቲ ቱና እያናን ዋርቃፌ፣ ቢራፔ፣ ናሴ ቢራታፔኔ ሹቻፌ ኦሴቲዳ ኤቃስ ጎይናሶና። ያላናው፣ ሲዓናው፣ ሃሙታናው ዳንዳያና ኤቃታስ ጎይኔይሳ አጊቦኮና። 21 አሳይ ዋዲይሳ፣ ቢቴይሳ፣ ላይማቴይሳኔ ካይሴይሳ አጊዲ ማሮታ ኦይቺቦኮና።

10

ኪታንቹዋኔ ጉላ ማፃፋ

1 ሄሳፌ ጉዬ፣ ታ ሃራ ዋልቃማ ኪታንቹይ ሳሎፔ ሳዓ ዋዲሺን ቤዓስ። ኢ ሻራ ማዒስ፤ ኢያ ሁዒያ ቦላ ዙላይ ደዔስ። ኢያ ሶሞዎይ አዋ ማላ፤ ኢያ ቶሆይ ታማ ቱሳ ማላ። 2 ሄ ኪታንቹይ ደያ ደዒያ ኢሲ ጉላ ፃላ ማፃፋ ባ ኩሼን ኦይኪዲ፣ ባ ኡሻቻ ቶሁዋ አባ ቦላ፣ ባ ሃዲርሳ ቶሁዋ ቢታ ቦላ ኤሲስ። 3 ጉዲያ ጋሞዳ ባ ቃላ ቶቁ ኦሊዲ ዋሲስ። ኢ ዋሲዳ ዋዴ ላፑን ዳዳቲ ባንታ ጉንላ ሲሲደሶና።

4 ላፑን ዳዳቲ ኦይቲዳ ዋዴ ታ ፃፋናው ጊጌታስ። ሺን ሳሎፔ፣ «ላፑን ዳዳቲ ኦዲዳይሳ ማታሜን ጎርዳፌ አቲን ፃፎፓ» ያጊያ ጊርሳ ሲዓስ።

5 ያቲዲ፣ አባ ቦላኔ ቢታ ቦላ ኤቁዳ፣ ታ ቤዒዳ ኪታንቹይ፣ ባ ኡሻቻ ኩሺያ ሳሎ ፑዴ ሚጨስ። 6 ኢ ሚጨዲ ሳሎኒኔ ኢያ ጊዶን ደዒያ ኡባ፣ ሳዓኒኔ ኢያ ጊዶን ደዒያ ኡባ፣ አባኔ ኢያ ጊዶን ደዒያ ኡባ ሜዲዳ፣ ሜሪናው ደዒያ ያሳ ሱንላን ጨቁዲ፣ «ሃዛፔ ጉዬ፣ ያሳይ ጋሞዔና። 7 ሺን ላፑንላ ኪታንቹይ ባ ሞይኪያ ፑኒያ ዋዴ ያሳይ ባ ኦይሌ ጊዲዳ ናቤታ ባጋራ ቆንጨሲዳ ፀራ ቆፋይ ፖሌታና» ያጊስ።

9:20 ማዝ 115:4 10:5 ኬሳ 20:11፤ ዛሬ 32:40፤ ዳኔ 12:7፤ አሞ 3:7

8 ሃሳፌ ጉዬ፣ አባ ቦላኔ ቢታ ቦላ ኤቂዲ፣ «ኢያ ኩሼን ደዬቲዲ ዳዒያ ፃላ ማፃፋ ኪታንቹዋ ኩሼፔ ኤካ» ያገዲ ናምዓንሖ ታው ኦዲሺን ሲዓሰ።

9 ታኒ ሄ ኪታንቹዋቦ ባዳ፣ ጉላ ፃላ ማፃፋ ኢማ ጋዳ ኦይቻሰ። ኢ ታኮ፣ «ኤካዳ ማ፤ ኢ ኔ ኡሎን ጫማና፣ ሺን ኔ ዶናን ኤሳዳ ማልዓና» ያገሰ።

10 ታኒ ኪታንቹዋ ኩሼፔ ሄ ጉላ ፃላ ማፃፋ ኤካዳ ማሰ፤ ታ ዶናን ኤሳዳ ማልዒሰ፣ ሺን ታ ኡሎን ጫሚሰ። 11 ሄሳፌ ጉዬ፣ ታኮ፣ «ኔኒ ያራ ኡባሰ፣ ዳሬ ኡባሰ፣ ዲማ ዲማ ዶናን ኦዴቲይሳታሲኔ ካዎታሰ ቲንቢቲ ዛራ ኦዳናው ቤሰሰ» ያገሰ።

11

ናምዑ ማርካታ

1 ሃሳፌ ጉዬ፣ ታው ዋቆ ፃምዓ ኢሚዲ፣ «ባዳ ያሳ ኬላኔ ያርሾ ቤሳ ዋቆ፤ ያን ጎይኒያ አሳታካ ፓይዳ። 2 ሺን ያሳ ኬላ ካሬ ዳባባይ አይሁዳ ጊዶና አሳሰ ኢሜቲዳ ጊሾ ዋቆና አጋጋ። አይሁዳ ጊዶና አሳይ ጌሻ ካታማ ኦይታማኔ ናምዑ አጌና ሃራና።

3 ታኒ ካሌ ማዒዳ ታ ናምዑ ማርካታ ኪታና፤ ኤንቲ 1260 ጋላሰ ቲንቢቲ ኦዳና» ያገሰ።

4 ሄ ናምዑ ማርካቲ አላሚያ ጎዳ ሲንላን ኤቂያ ናምዑ ሻማሆ ሚላታኔ ናምዑ ያምፔ ዋሊያ ኮጫታ። 5 ኦኒካ ኤንታ ቆሃናው ኮይኮ ኤንታ ዶናፔ ታሚ ኮይዲ፣ ኤንታ ሞርኬታ ቆይሰሰ። ኤንታ ቆሃናው ኮያ ኦኒካ ሃሳዳ ሃይቃና። 6 ኤንቲ ቲንቢቲ ኦዲያ ዋዴ ኢሪ ቡኮና ሜላ ሳሉዋ ጎርዳናው ኤንታው ማቲ ዳዔሰ። ኤንታው ሃሌ ሱሊ ኬሳናው፣ ቃሲ ኤንቲ ኮይዳ ሜላ ቢታ ዲማ ዲማ ጋዶን ቆይሳናው ኤንታው ማቲ ዳዔሰ።

7 ኤንቲ ባንታ ማርካቲላ ኦንጊዳፔ ጉዬ፣ ኦላፌ ኬያ ደዓይ ኤንታና ኦላና። ሄ ደዓይ ኤንታ ያናና፤ ዋቆና። 8 ኤንታ ጎዳይ ማሰቃሊያ ቦላ ካቁቲዳ ጊታ ካታማ ኦጊያ ቦላ ኤንታ አሃይ ዬጌታና። ሄ ካታማይ ለሚሰን ሰዶማ ዋይኮ ጊብፄ ጌቲቲ ቆጌቲሰ። 9 ቃሲ ዜሬሊ ኡባፌ፣ ያራ ኡባፌ፣ ዲማ ዲማ ዶናፔኔ ካዎቲሊ ኡባፌ ዬዳ አሳይ ኤንታ አሃ ሄሹ ጋላሲኔ ባጋ ጋካናው ቤዓና። ኤንታ አሃይ ሞጌቶና ሜላ አሳይ ዲጋና። 10 ሃ ናምዑ

10:8 ሂዝ 2:8-3:3 11:1 ሂዝ 40:3፤ ዛካ 2:1 11:2 ሉቃ 21:24
11:4 ዛካ 4:3 11:6 1ካዎ 17:1፤ ኬሳ 7:17 11:7 ዳኔ 7:7፤ ዮ.ቆ
13:5 11:8 ኢሳ 1:9

ናቤቲ ሳዓን ዳዒያ አሳ ዋይሲዳ ጊሾ አሳይ ኤንታ ሃይቁዋን ኡፋይታና። ባንታ ኡፋይሳ ቤሳናው ኢሶይ ኢሱዋስ ኢሞታ ኢማና።

11 ሃቹ ጋላሲኔ ባጋፌ ጉዬ፣ ዳዖ አያናይ ያሳ ማታፔ ዪዲ ኤንታን ጌሊን፣ ኤንቲ ዳንዲ ኤቁዶሶና። ኤንታ ቤዒዳ ኡባይ ጌታ ያሺ ያዪዶሶና። 12 ሃሳፌ ጉዬ፣ ሄ ናሞዑ ናቤቲ፣ «ሃ ፑዳ ኬዩቲ» ጊያ ቃላ ሳሎፔ ሲዒዶሶና። ኤንታ ሞርኬቲ ኤንታና ቤዒሺን፣ ኤንቲ ሻራን ጌሊዲ ፑዳ ሳሎ ቢዶሶና።

13 ሄ ሳቲያን ቢታይ ዋልቃማ ቃዖ ቃዒን፣ ካታማፔ ታማንዳ ኩሼይ ቆይሰ። ቃሲ ቢታ ቃዖን ላፑን ሙኩሉ አሳይ ሃይቁሰ። አቲዳ አሳይ ዳሮ ኮኮሪዲ ባቢዲ፤ ሳሎ ያሳስ ቦንቾ ኢሚዶሶና።

14 ናሞዓንዳ አዬይ አዲሰ፣ ሺን ሄኮ ሃቸንዳ አዬይ ኤሶን ያና።

ላፑንሳ ሞይዚያ

15 ላፑንሳ ኪታንቾይ ባ ሞይዚያ ፑኒሰ። ሳሎፔ፣ «ሳዓ ካዋቲላይ ኑ ጎዳሲኔ ከሪሰቶሳሰ ጌዲሰ፤ ኢ ሜሪናፔ ሜሪና ጋካናው ሃራና» ያጊያ ዋልቃማ ቃላይ ሲዒቲሰ። 16 ያቲን፣ ያሳ ሲንሳን፣ ባንታ አራታን ኡቲዳ ላታማኔ ኦይዲ ጨማቲ ጉፋኒዲ፣ ያሳስ ጎይኒዲ።

17 «ሃዒካ ካሴካ ዳዔይሶ፣ ጎዳው፣ ኡባፌ ዋልቃማ ያሳው፣ ኔኒ ጌታ ዋልቃ ኦይካዳሳ። ኔኒ ሃራናው ደሚዳ ጊሾ ኩኒ ኔና ጋላቶስ።

18 አይሁዳ ጌዶና አሳይ ሃንቁቲዶሶና፣ ሺን ኔ ሃንቆይ ዪሰ። ሃይቁዳይሳታ ቦላ ኔ ፐርዲያ ዋዳይ ዪሰ። ኔኒ ኔ አይሌታ፣ ናቤታስ

ጌሻታሲኔ ኔ ሱንሳሰ ያዬይሳታስ፣ ጉሳታሲኔ ጌታታስ፣ ኤንታ ኦሱዋዳ ኢሚያ ዋዳይ ጋኪሰ። አላሚያ ቆይሴይሳታ ቆይሲያ ዋዳይ ዪሰ» ያጊዶሶና።

11:11 ሃዘ 37:10 11:12 2ካዎ 2:11 11:13 ዮ.ቆ 6:12፤ 16:18
11:15 ኬሳ 15:18፤ ዳኔ 2:44፤ 7:14 11:17 ኬሳ 3:14 11:18 ማዘ 2:5፤ 110:5፤ 115:13

19 ሳሎን ደዲያ ጾሳ ከላይ ደዩቲስ፤ ኢያ ጊደን ጾሳ ጫቆ ታቦቲይ በንቲስ። ቃሲ ዋልዓንሱ ዋልዓሚስ፡ ዳሾይ ዳቺስ፤ ዳዲ ቆቁስ፤ ቢቲ ቃዲስ፤ ሻቺ ቡኪስ።

12

ማጨሲዉኔ ዳዊያ

1 ሄሳፌ ጉዬ፡ ሳሎን ዋልቃማ ማላቲ በንቲስ። አዋ ማዓዳ፡ አጌና ቦላ ኤቃዳ፡ ታማኔ ናምቡ ያለንቶ ካላቻ ባ ሁዔን ዋሉዳ ደዲያ፡ ኢሲ ማጨሲያ በንታሱ። 2 ሄ ማጨሲያ ቃንሌሺን፡ ኢዮ ኢቁሉ ኦይኪን ኡንዔታዳ ዋሳሱ።

3 ቃሲ ሃራ ማላቲ ሳሎን በንቲስ። ላፑን ሁዔቲኔ ታሙ ካጨቲ ደዲያ ጌታ ዘዎ ዳዊይ በንቲስ። ኢ ባ ሁዔታ ቦላ ላፑን ካላቻ ዋሉስ። 4 ሄ ዳዊይ ባ ጎይናን ያለንቶታፔ ሲኩዋ ሳሎፔ ዳፊዲ ሳዓን ዩጌስ። ሄ ዳዊይ ናዓይ ዩሉቲ ዋቋዳ ሜላ ሚታናው ኮዩዳ፡ ዩላናው ኤቁቲያ ማጨሲ ሲንላን ኤቁስ።

5 ሄ ማጨሲያ ካዋቱላ ኡባ ቢራታ ፃምዓን ሃራናው ደዲያ አዳ ናዓ ዩላሱ። ናዓይ ጾሳኮኔ ኢያ አራታኮ ፑዳ ኤኬቲስ።

6 ማጨሲያ 1260 ጋላስ ጋካናው ኢዮ ናጋና ሜላ ጾሳይ ኢው ጊሊሲ ዋሉዳ ቤሳ ባዘ ቢታ ባቃታሱ።

7 ሳሎን ኦሊ ሜቆቲስ። ሚካዔሌይ ባ ኪታንቸታራ ዳዊያራ ኦሌቲስ፤ ዳዊይ ባ ኪታንቸታራ ጊዲዲ ዛሪ ኦሌቲስ። 8 ሺን ዳዊይ ያኔቲዲ ሳሎን ኤንታው ደዲያ ቤሲ ቆዩደሶና። 9 ጌታ ዳዊይ፡ ቤኒ ሾሻይ፡ ሳዓን ዩጌቲስ። ኢካ ዳቡሎሳ ዋይኮ ፃላሄ ጌቲቲያ አላሚያ ባሌሌይሳ። ኢ ባ ኪታንቸታራ ኢሲፌ ዳጌ አላሚያ ዩጌቲስ።

10 ሄሳፌ ጉዬ፡ ሳሎን ሃይሳዳ ያጊያ ቃላ ሲዓስ።

«ሃዒ አቶቱላይ፡ ዋልቃይኔ ካዋቱላይ፡ ኑ ጾሳሳ፤

ማታይ ኪሪስቶሳስ ጊዲስ።

ሂዛ፡ ቃማኔ ጋላስ ጾሳ ሲንላን፡

ኑ አሻታ ሞቲይሲ ሳሎፔ ዳጌ ሆሌቲስ።

11 ኤንቲ ደርሳ ሱላኒኔ ባንታ ማርካቴላ ቃላን፡

ኢያ ኦሊዲ ያኒደሶና።

ኤንቲ ባንታ ሼምፑዋስ ሚሼቶና

11:19 ዮ.ቆ 8:5፤ 16:18፣ 21 12:3 ዳኔ 7:7 12:4 ዳኔ 8:10 12:5
ኢሳ 66:7፤ ማዝ 2:9 12:7 ዳኔ 10:13 12:9 ሜዴ 3:1፤ ሉቃ 10:18
12:10 ኢዮ 1:9

ባንታና ሃይቆስ አሉ ኢሚዶሶና።

12 ሃሳ ገሾ፣ ሳሎኒኔ ኢያ ገደን ዳዔይሳቶ ኡፋይቲቲ።

ሺን ቢታኔ አባ አዬ!

ሂዛ፣ ፃላሂይ ባው ጉላ ዋዳይ አቲዳይሳ ኤሪዳ ገሾ

ዋልቃማ ሃንቆን ሂንቴኮ ዋዲስ»

ያገሰ።

13 ቃሲ ዳዊይ ባና ሳዓ ዩገዳይሳ ቤዒዳ ዋዳ አዳ ናዓ ዩሊዳ ማጨሲው ጎደሰ። 14 ማጨሲው ሾሻይ ቆሆና ማላ ሂዙ ላይሴኔ ባጋ ማሼኔ ኡያሾ ኢያ ናጌቲያ ቤሲ ባዞ ቢታ ፒራዳዳ ባና ማላ ናምዑ ዋልቃማ አርጋንሳ ቁፌይ ኢው ኢሜቲስ።

15 ያቲዲ፣ ማጨሲው ዲያይ ዲዒዲ ኤፋና ማላ ዳዊይ ሻፋ ሃላ ማላ ባ ደናፔ ማጨሴ ጉዬራ ጮዩስ። 16 ሺን ቢታይ ማጨሲው ማዲስ፤ ቢታይ ባ ደና ዶዩዲ ዳዊያ ደናፔ ከዩዳ ሃላ ሚቲስ። 17 ሄ ዳዊይ ማጨሴ ቦላ ዳር ሃንቁቲዲ፣ ኢ ዜሪሳታ፣ ያሳ ከታ ናጌይሳታኔ ዩሱሲ ቆንጨሲዳ ቱማሰ አማኔቲዳይሳታ ኦላናው ቢዲ። 18 አባ ጋፃን ዳዒያ ሻፊያን ኤቁስ።

13

ናምዑ ደዓታ

1 ሃሳፌ ጉዬ፣ ኢሲ ደዓይ አባፌ ከዩሺን ቤዓስ። ኢያው ታሙ ካጨይኔ ላፑን ሁዔይ ዳዔስ። ሄ ታሙ ካጨታ ቦላ ታሙ ካላቻቲ ዳዖሶና። ሄ ሁዔታ ቦላ ያሳ ጫሻ ሱንላቲ ፃፊቲዲ ኡቲስ። 2 ታ ቤዒዳ ደዓይ ማሄ ዳኔስ፤ ኢያ ቶሆይ ባባንሳ ቶሆ ማላ፤ ኢያ ደናይካ ጋሞ ደና ዳኔስ። ዳዊይ ባ ዋልቃ፣ ባ አራታኔ ባ ገታ ማታ ሄ ደዓስ ኢሚስ።

3 ሄ ደዓ ሁዒያፔ ኢሱዋ ቦላ ሃይቆስ ጋሊያ ማዲንላ ቤዓስ፣ ሺን ሄ ማዲንላይ ፓዲስ። አላሚያ አሳ ኡባይ ማላሌቲዲ ሄ ደዓ ካሊስ። 4 ዳዊይ ባ ማታ ደዓስ ኢሚዳ ገሾ አሳ ኡባይ ዳዊያ ጎይኒዶሶና፣ ቃሲ አሳይ፣ «ደዓ ማሊ ኦኔ? ኢያራ ኦሌታናው ዳንዳዔይ ኦኔ?» ያገዲ ደዓስ ጎይኒዶሶና።

5 ሄ ደዓስ ኦቶርታና ማላኔ ጫያና ማላ ደኒ ኢሜቲስ፤ አይታማኔ ናምዑ አጌና ሃራና ማላ ማቲ ኢያው ኢሜቲስ። 6 ሄ ደዓይ ያሳ፣ ኢያ ሱንላ፣ ኢ ዳዒያ ቤሳኔ ሳሎን ዳዒያ ኡባ ቃንጌላ ኦይኪስ። 7 ሄ ደዓይ ጌሻታራ ኦሌቲዲ፣ ኤንታና ያናና ማላ ዋልቁ

12:14 ዳኔ 7:25፤ 12:7 13:1 ዳኔ 7:3፤ ዮ.ቆ 17:3 13:2 ዳኔ 7:4 13:5 ዳኔ 7:8፣ 25፤ 11:36

ኢያው ኢሜቲስ። ያራ ኡባ፣ ዳሬ ኡባ፣ ዲማ ዲማ ደና ኡባ ቦላኔ ዜሬሌ ኡባ ቦላ ማቲ ኢያው ኢሜቲስ። 8 አላሚይ ሜዴቶሳፔ ደሚዲ፣ ሹኬቲዳ ደርሳ ዴያ ማፃፋን ኤንታ ሱንላይ ፃፌቶና ሃ ሳዓን ዴዒያ አሳ ኡባይ ሄ ደዓሰ ጎይናና።

9 ሲዒያ ሃይሌ ዴዒያ አሲ ሲያ። 10 ኦኒካ ዲዒታናው ዴዒይ ዲዒቴስ። ማሻን ሃይቃናው ዴዒይ ማሻን ሹኬታና። ሄሳንካ ጌሻታ ዳንዳዒይኔ አማኖይ ኤሬታና።

11 ቃሲካ፣ ሃራ ደዒ ሳዓፔ ኮዩሺን ቤዓስ። ኢያው ደርሳ ካጩ ዳኒያ ናምዑ ካጩይ ዴዒስ፤ ኢያ ሃሳያይ ዳዋይሳ ሜላ።

12 ሄ ደዓይ ኮይሮ ደዓ ቤሳን፣ ኢያ ማታን አሌስ። ኢካ ሃይቆስ ጋሌያ ማዲንላፊ ፓዲዳ ኮይሮ ደዓስ፤ ቢታን ዴዒያ አሳ ኡባይ ጎይናና ሜላ አሌስ። 13 ሄ ናምዓንሉ ደዓይ ሃሪ አቶሺን፣ ታማ ሳሎፔ አሳ ኡባ ሲንላን ዎዲሳና ጋካናው ጌታ ማላታታ አሌስ።

14 ኮይሮ ደዓ ቤሳን አላና ሜላ፣ ኢያው ኢሜቲዳ ማላታታን ሳዓን ዴዒያ አሳ ኡባ ኢ ባሌሌስ። ማሻን ማዲንዲ ፓዲዳ ደዓ ቦንቾስ ሚሲሌ ገሊሳና ሜላ ኤንታና ከቲስ። 15 ናምዓንሉ ደዓይ ኮይሮ ደዓ ሚሲሊያስ ሸምፖ አሚዲ ኦዴታና ሜላኔ ኢያው ጎይኖናይሳቲ ሃይቃና ሜላ አሌያ ማቲ ኢሜቲስ።

16 ሄ ናምዓንሉ ደዓይ ጌቲኔ ጉሌ፣ ማንቆይኔ ዲሬይ፣ ዎማኖይኔ አይሌይ ባ ኡሻቻ ኩሼን ዎይኮ ባ ሶምፖን ማላ ዎላና ሜላ አሌስ። 17 ሄ ደዓ ሱንላይ ዎይኮ ኢያ ሱንላ ፓይዲዎ ማላይ ባይና አሲ ኦኒካ ባይዛናዉኔ ሻማናው ዳንዳዒና።

18 ጨንጫቲሌ ኮሼይ ሄሳና። ኤራቲሌ ዴዒያ ኦኒካ ሄ ደዓ ፓይዲዎ ቢርሼላ ኤር፤ ሄ ፓይዲይ አሳ ሱንሌ። ሄ ፓይዲይ ኡሱቱን ፃታኔ ኡሱቱን ታማኔ ኡሱቱና።

14

ደርሳኔ 144፡000 አሳ

1 ሄሳፊ ጉዬ፣ ደርሳይ ሂዮኔ ዴሪያ ቦላ ኤቁዳይሳ ቤዓስ። ኢያራ ኢያ ሱንላይኔ ኢያ አዎ ሱንላይ ኤንታ ሶምፖን ፃፊቲዳ፣ 144፡000 አሳይ ዴዒስ። 2 ሳሎፔ ጌታ ሃላ ጉንሉኔ ዳዳ ጉንሉ ዳኒያ ዎልቃማ ገርሲ ሲዓስ። ቃሲ ታ ሲዒዳ ገርሳይ ዲሌ ዲዲሺን ሲዒቲያ ገርሳ ሜላ። 3 144፡000 አሳይ አራታ ሲንላን፣ አይዲ ዴፖን ዴዒያ ሜዴቲላታ ሲንላኒኔ ጨማታ ሲንላን

13:7 ዴኔ 7:21 13:8 ማዝ 69:28 13:10 ኤር 15:2፤ 43:11 14:1 ሂዝ 9:4፤ ዮ.ቆ 7:3

ከቆዳ ከንታፊ ሃራ ኦኒካ ታማራናው ዳንዳዖና ኦራላ ማዝሙራ ዩዲዳሶና። 4 ሃይሳቲ ማጫሳራ ባንታና ቱኒሶና ናጊዳ ጌሻታ። ከንቲ ዶርሳይ ቢያሶ ኡባ ካሎሶና። ከንቲ ያሳሲኔ ዶርሳሰ ባይራ ጊዲዲ፣ ሺቃናው ሳዓ አሳ ጊደፊ ወዘተዶሶና። 5 ከንቲ ወርዶይኔ ቦሬይ ባይና አሳታ።

ሄቩ ኪታንቸታ

6 ሄሳፊ ጉዬ፣ ማሪና ወንጌላ ሳዓ ቦላ ዳዒያ ካዎቴላ ኡባሰ፣ ዘሬሌ ኡባሰ፣ ያራ ኡባሲኔ ዲማ ዲማ ዶና ኡባሰ ማርካታናው ሳሎራ ፒራዲያ ሃራ ኪታንቸ ቤዓሰ። 7 ሄ ኪታንቸይ ባ ቃላ ቆቁ ኦሊዲ፣ «የሳይ አላሚያ ፒርዲያ ሳቴይ ጋኪዳ ጊሾ ያሳሰ ያዩቴ፤ ኢያ ቦንቸቴ። ሳሎ፣ ሳዓ፣ አባኔ ፑልቶ ሃላ ማዲዳ ያሳ ጎይኒቴ» ያገሰ።

8 ኮይርይሳ ካሊዲ ሃራ ናምዓንላ ኪታንቸይ፣ «ዳሬ ኡባ ቱናኔ ማሉያ ወይኔ ኡሺዳ፣ ጌታ ባቢሎኔይ ኩንዳሱ! ኩንዳሱ!» ያገዲ ዋሲሰ።

9 ሄቫንላ ኪታንቸይ ከንታ ካሊዲ፣ ባ ቃላ ቆቁ ኦሊዲ፣ «ዶዓኔ ኢያ ሚሲሊያ ጎይኒያ ቃሲ ኢያ ማላ ባ ሶምዖን ወይኮ ባ ኩሼን ዋሊያ ኦኒካ ዳዒኮ፣ 10 ኢ ሃንቆ ፀዓን ኩሚዳ ያሳ ሃንቆ ወይኒያ ኡያና። ከንቲ ጌሻ ኪታንቸታ ሲንላኒኔ ዶርሳ ሲንላን ኤዲያ ዲኔ ታማን ወይታና። 11 ከንታ ዋያ ጩያይ ማሪ ማሪናው ጩዩሼ ዳና። ዶዓኔ ኢያ ሚሲሊያ ጎይኒይ ቃሲ ሄ ዶዓ ሱንላ ማላይ ዳዒያ ኦኒካ ቃማኔ ጋላሰ ሺምፖይ ባይና ካዔታና» ያገሰ።

12 ያሳ ኪታ ናጌይሳቲኔ ዬሱሳ አማኔቴይሳቲ ጌንጩያ ሚኖቴላይ ቆንጩያ ወዳይ ሄሳ።

13 ሄሳፊ ጉዬ፣ «ሂዛፔ ጎዳን ሃይቂይሳቲ አንጃቲዳይሳታ» ያገያ ቃላ ሳሎፔ ሲዓሰ።

አያናይ፣ «ኤ ቱማ፣ ከንታ ኦሶይ ከንታ ካሊያ ጊሾ ከንቲ ባንታ ዳቡራፔ ሺምፓና» ያገሰ።

ካላ ሺሾ ወዳ

14 ሄሳፊ ጉዬ፣ ቦላ ሻራ ቦላ ኡቲዳ አሳ ናዓ ዳኔይሳ ቤዓሰ። ኢ ባ ሁዓን ወርቃ ካላቻ ዋሊሰ፤ ቃሲ ባ ኩሼን ባጫ ኦይኪሰ።

15 ሃራ ኪታንቸይ ያሳ ኮላፊ ኮዩዲ፣ ሻራ ቦላ ኡቲዳይሳኮ ባ

14:5 ሶፎ 3:13 14:8 አሳ 21:9፤ ኤር 51:8፤ ዮ.ቆ 18:2 14:10
አሳ 51:17፤ ሜዴ 19:24፤ ሂዝ 38:22 14:11 አሳ 34:10 14:14 ዳኔ
7:13-14

ቃላ ቆቁ ኦሊዲ፡ «ካላ ሺሾ ዎይይ ጋኪዳ ጊሾ ኔ ባጫ ዬዳዳ ካላ ጫካ፤ ሳዓን ዳዒያ ካላይ ጋኪሰ» ያጊሰ። 16 ያቲን ሻራ ቦላ ኡቲዳይሲ ባ ባጫ ሳዓ ዬዲዲ፡ ሳዓን ዳዒያ ካላ ጫኪሰ።

17 ቃሲካ ሳሎን ዳዒያ ያሳ ኬላፌ ሃራ ኪታንቸይ ኬዩሰ፤ ኢያዉካ ኦጮ ባጫ ዳዒሰ።

18 ታማ ቦላ ማቲ ዳዒያ ሃራ ኪታንቸይ ያርሾ ቤሳፌ ኬዩሰ። ኢ ባ ቃላ ቆቁ ኦሊዲ ኦጮ ባጫ ኦይኪዳ ኪታንቸዋኮ፡ «ዎይ ኣይፌይ ቴሪዳ ጊሾ ኔ ኦጮ ባጫ ዬዳዳ፡ ሳዓን ዳዒያ ዎይኒያፔ ቃንፃ» ያጊሰ። 19 ሄ ኪታንቸይ ባ ባጫ ዬዲዲ፡ ሳዓን ዳዒያ ዎይኒያፔ ቃንፃዲ፡ ያሳ ጊታ ሃንቁዋ ጉምዒያ ቤሳን ዬጊሰ። 20 ኤንቲ ካታማፔ ጋፃን ዳዒያ ዎይ ኣይፌ ጉምዒያ ቤሳን ዬዴቲዶሶና። ሱላ ዎይኒያ ጉምዒያ ቤሳፌ ኬዩዲ ኢሲ ሙኩሉኔ ኡሰፑን ፃቱ ኪሎ ማቲሬ ማላ ሃኪዲ፡ ፓራ ፑሎ ጋኪያ ማላ ኤሊዲ ቆቁ ጊሰ።

15

ወርሴላ ቦሻታ

1 ታኒ ሳሎን ሃራ ጊታኔ ማላሊሲያ ማላታ ቤዓሰ። ያሳ ወርሴላ ሃንቁዋ ቆንጫሲያ ላፑን ቦሻታ ኦይኪዳ ላፑን ኪታንቸቲ ዳዖሶና።

2 ቃሲ ታማራ ዋላኬቲዳ ቡርጩኮ ኣባ ዳኔይሳ ቤዓሰ። ሄ ኣባ ጋፃን ዶዓ፡ ኢያ ሚሲሊያኔ ኢያ ሱንላ ታይቡዋ ያኒዳይሳታ ቤዓሰ። ያሳይ ኤንታው ኢሚዳ ዲላ ኦይኪዲ ኤቁዶሶና። 3 ኤንቲ ያሳ ኣይሊያ ሙሴ ማዝሙሪያኔ ዶርሳ ማዝሙሪያ ሃይሳዳ ያጊድ ዬዖሶና።

«ጎዳው፡ ኡባፌ ዎልቃማ ያሳው፡
ኔ ኦሶይ ጊታኔ ማላሊሲያባ።
ዳሬ ኡባ ካዋው፡
ኔ ኦጌይ ሂሎኔ ቱማ።

4 ጌሺ ኔ ፃላላ ጊዲያ ጊሾ
ጎዳው፡ ኔው ያዮናይኔ
ኔ ሱንላ ቦንቸናይ ኦኔ?
ኔ ሂሎ ኦሶይ ኣሳ ኡባሰ ቆንጫፎ ጊዲያ ጊሾ
ካዋቴላ ኡባይ ኔ ሲንሴ ዩዲ ጎይናና»

14:15 እዩ 3:13 14:20 ኣሳ 63:3፤ ኤር.ዜ 1:15፤ ዮ.ቆ 19:15 15:3 ኬሳ 15:1

ያገዲ ይጸረጸ።

5 ሃሳፌ ጉዬ፥ ሳሎን ደዩቲዲ ዳዒያ ጸላ ኬላ፥ ኢካ ማርካቴላ ዲንካኒያ ቤዓስ። 6 ላፑን ቦሻታ ኦይኪዳ ላፑን ኪታንቸቲ ጸላ ኬላፌ ኬዩደሶና። ኤንቲ ጌሺኔ ጰሊያ ሊኖ ማፆ ማዒደሶና፤ ባንታ ቲራን ዋርቃ ዳንጮ ዳንጪደሶና። 7 ኦይዲ ሜዴቴላታፔ ኢሶይ፥ ሜሪናው ዳዒያ ጸላ ሃንቆይ ኩሚዳ ላፑን ዋርቃ ፀ-ዓታ ላፑን ኪታንቸታስ ኢሚስ። 8 ጸላ ቦንቹዋፌኔ ኢያ ዋልቃፌ ዳንደይሳን ጸላ ኬላይ ጩያን ኩሚስ። ላፑን ኪታንቸቲ ኦይኪዳ ላፑን ቦሻቲ ፖሌታና ጋካናው ጸላ ኬላ ኦኒካ ጌላናው ዳንደዒቤና።

16

ጸላ ሃንቆይ ኩሚዳ ፀ-ዓታ

1 ሃሳፌ ጉዬ፥ ጸላ ኬላፌ ላፑን ኪታንቸታኩ፥ «ቢዲ ጸላ ሃንቁዋ ላፑን ፀ-ዓታፔ ሳዓን ጉሲቴ» ያገዲ፥ ኦዲያ ዋልቃማ ቃላ ሲዓስ።

2 ኮይሮ ኪታንቸይ ቢዲ፥ ባ ፀ-ዓን ዳዒይሳ ሳዓን ጉሲን፥ ደዓ ማላይ ዳዒይሳታ ቦላኔ ኢያ ሚሲሊያ ጎይኒዳይሳታ ቦላ ኢታኔ ዛሚያ ማዲንሱ ኬዩስ።

3 ናምዓንሎ ኪታንቸይ ባ ፀ-ዓን ዳዒይሳ ኣባን ጉሲን፥ ኣባይ ሃይቁዳ ኣሳ ሱሉ ዳኒስ። ቃሲ ኣባን ዳዒያ ሜዴቴላ ኡባይ ሃይቁስ።

4 ሃቭሎ ኪታንቸይ ባ ፀ-ዓን ዳዒይሳ ሻፋታኒኔ ፑልቶ ሃላታን ጉሲን፥ ሃላቲ ሱሉ ገዲደሶና። 5 ሃሳፌ ጉዬ፥ ሃላ ቦላ ማቲ ዳዒያ ኪታንቸይ ሃይሳዳ ያገሺን ሲዓስ።

«ሃዒካ ቤኒካ ዳዒያ ጌሻው፥
ሃይሳዳ ኔ ፐርዲዳ ገሾ ኔኒ ዲሎ።»

6 ኤንቲ ጌሻታ ሱላኔ ናቤታ ሱላ ጉሲዳ ገሾ
ኤንቲ ሱሉ ኡያና ማላ ኦላዳሳ።

ኤንቲ ባንታው ቤሲያባ ኤኪደሶና
ያገሰ። 7 ያርሾ ቤሳፌ፥

«ጎዳው፥ ኡባፌ ዋልቃማ ጸላው፥
ኔ ፐርዲይ ቱማኔ ዲሎ»

ያገያ ቃላ ሲዓስ።

15:4 ኤር 10:7፤ ማዝ 86:9 15:5 ኬሳ 38:21 15:8 ኬሳ 40:34፤
1ካዎ 8:10 16:2 ኬሳ 9:10 16:4 ኬሳ 7:17 16:5 ኬሳ 3:14

8 ኦይዳንፉ ኪታንቸይ ባ ፀዓን ዴዔይሳ አዋ ቦላ ጉሲን፣ አዋይ ባ ሴላን ኣሳ ፀጋና ሜላ አዋስ ዋልቂ ኢሚቲስ። 9 ኣሳይ ዋልቃማ ሴላን ፀጌቲዲ፣ ሄ ቦሻታ ቦላ ማቲ ዴዔያ ያሳ ሱንፋ ባዲደሶና፤ ባንታ ናጋራፔ ሲሚዲ ያሳ ቦንቺቦኮና።

10 ኢቻሻንፉ ኪታንቸይ ባ ፀዓን ዴዔይሳ ደዓ ኣራታ ቦላ ጉሲን፣ ሄ ደዓ ካዋቴላይ ቋሚስ። ኣሳይ ኡንዓ ጊሾ ባንታ ኢንፃርሳ ሳይሶና። 11 ቃሲ ኣሳይ ኡንዓ ጊሾኔ ማዲንፋ ጊሾ ሳሎ ያሳ ባዲደሶና፤ ባንታ ኦሊዲ ናጋራፔ ሲሚቦኮና።

12 ኡሱፑንፋ ኪታንቸይ ባ ፀዓን ዴዔይሳ ጊታ ኤፊራዒሴ ሻፋን ጉሲን፣ ደሎሃ ባጋፌ ያና ካዋታስ ኦጌይ ጊጋና ሜላ ሃላይ ሜሊስ። 13 ሄሳፌ ጉዬ፣ ሾጴ ዲኒያ ሄሹ ቱና ኣያናቲ ዳዊያ ደናፔ፣ ደዓ ደናፔኔ ዋርደ ናቢያ ደናፔ ኬዪሺን ቤዓስ። 14 ኤንቲ ማለታታ ኦሊያ ቱና ኣያናታ። ሄ ሄሹ ቱና ኣያናቲ ኡባፌ ዋልቃማ ያሳ ጊታ ጋላሳን ሃናናው ዴዔያ ኦላስ ሺሻናው ኣላሜ ካዋታ ኡባኮ ባና።

15 «ሄኮ፣ ታ ካይሶዳ ያና! ኣሳ ሲንፋን ካሎቶናዲኔ ዬላቶናዳ ባርኪዲ፣ ባ ማዑዋ ናጊያ ኡራይ ኣንጃቲዲይሳ!» ያጊስ።

16 ሄ ቱና ኣያናቲ ካዋታ ኢብራይስጻ ደናን ኣርማጌዶኔ ጊያ ቤሳን ሺሺደሶና።

17 ላፑንፋ ኪታንቸይ ባ ፀዓን ዴዔይሳ ጫርኮ ቦላ ጉሲን፣ ያሳ ኬላን ዴዔያ ኣራታፔ፣ «ፖሌቲስ» ያጊያ ዋልቃማ ቃላይ ዪስ። 18 ሄሳፌ ዋልዓንፉ ዋልዓሚስ፤ ዳዲይ ቋቂስ፣ ቢታይ ቃዒስ። ኣሲ ሳዓን ሜዴቶሳፔ ቢቲ ሄሳ ሜላ ቃፆ ቃዒቤና። ሄሲ ኡባፌ ኣዲዳ ቃፆ። 19 ጊታ ካታማይ ሄሹ ኬዪዲ ሻኬቲስ፤ ቢታ ኡባን ዴዔያ ካታማቲ ቋዪደሶና። ያሳይ ጊታ ካታማ ባቢሎኔ ቆፒዲ፣ ባ ኢታ ሃንቆ ዋይኔ ኡሻይ ኩሚዳ ፀዓ ኢው ኢሚስ። 20 ሃላን ቱቄቲዳ ቢታቲ ቋዪደሶና፤ ዴሬቲካ ቤንቲቦኮና። 21 ኣሳ ቦላ ኦይታማኔ ኢቻሹ ኪሎ ጊራሜ ሜላ ዴዔያ ዋልቃማ ሻቺ ሳሎፔ ቡኪስ። ቦሻይ ዳር ኢታ ጊዲያ ጊሾ ኣሳይ ሻቻ ቦሻ ጊሾ ያሳ ባዲደሶና።

17

ጊታ ላይማቲያ ማጫሲው

16:10 ኬሳ 10:21 16:12 ኣሳ 11:15 16:15 ማቶ 24:43 16:16 2ካዋ 23:29፤ ዛካ 12:11 16:18 ዮ.ቆ 8:5፤ 11:13 16:19 ኣሳ 51:17
16:20 ዮ.ቆ 6:14 16:21 ኬሳ 9:23

1 ላፑን ፀዓታ ኦይኪዳ ላፑን ኪታገቾታፔ ኢሶይ ታኮ ዪዲ፥ «ሃያ፤ ዳር ሃላታ ቦላ ኡቲዳ ጌታ ላይማቲያ ማጫሴ ቦላ ያናው ዳዒያ ፐርዳ ታ ኔና ቤሳና። 2 አላሚያ ካዎቲ ኢራ ላይማቲዶሶና፤ አላሚን ዳዒያ አሳይካ ኢ ላይማቲላ ዎይኒያ ኡዪዲ ማላቲዶሶና» ያገሰ።

3 ሄ ኪታገቾይ ታና ጌሻ አያናን ባዞ ቢታ ኤፊሰ። ያን ኢሲ ማጫሴያ ጫሻ ሱገላይ ኢ ቦላ ኡባን ፃፊቲዲ ኡቲዳ፥ ዘዎ ደዓ ቶጊዳር ቤዓሰ፤ ሄ ደዓሰ ላፑን ሁዔይኔ ታሙ ካጩይ ዳዒሰ። 4 ሄ ማጫሴያ ካሎሴ ማዖኔ ዘዎ ማዖ ማዓሱ፤ ኢያ ዎርቃን፥ ቦንቾ ሹቻኒኔ ኢንቆ ጊያ አልዎ ሹቻን አሌቄታሱ። ኢያ ባ ኩሽን ቦርሲያባኔ ላይማቲላ ቱናቲላን ኩሚዳ ዎርቃ ፀዓ ኦይካሱ። 5 ኢ ሶሞዖን ፀራ ኦሶ ቢርሽላይ ዳዒያ ሱገላይ፥ «ጌታ ባቢሎኔይ፥ ላይማቲላሴ ሳዓን ዳዒያ ቱናባ ኡባሰ አዮ» ያገያ ፀፊይ ፃፊቲዲ ኡቲሰ። 6 ቃሲ ሄ ማጫሴያ ጌሻታ ሱላኔ ዪሱሳሰ ማርካቲሽ ሃይቄዳይሳታ ሱላ ኡያዳ ማላቲዳር ታ ቤዓዳ ማላሌታሰ።

7 ኪታገቾይ ታኮ፥ «ኔኒ አይሰ ማላሌታይ? ታኒ ኔው ማጫሴ ፀራኔ ኢያ ቶኪዳ ላፑን ሁዔይኔ ታሙ ካጩይ ዳዒያ ደዓ ፀራ ኦዳና። 8 ኔኒ ቤዒዳ ደዓይ ኮይር ዳዒሰ፥ ሺን ሃዒ ባዎ። ሄ ደዓይ ጨዋ አላፊ ኬዪዲ ቆዮሰ ባና። ሳዓይ ሚጴቶሳፔ ደሚዲ፥ ዴዎ ማፃፃን ኤገታ ሱገላይ ፃፊቲቦና ሳዓን ዳዒያ አሳይ ደዓ ቤዒዲ ማላሌታና። ሂዛ፥ ኢ ካሴ ዳዒሰ፤ ሃዒ ባዎ፥ ሺን ሲገላፊ ያና።

9 «ሃይሲ ጨንጫቲላኔ አኩካ ኮዬሰ። ላፑን ሁዔቲ ማጫሴያ ኡቲያ ላፑን ዳሬታ፤ ሄሳቲ ቃሲ ላፑን ካዎታ። 10 ኤገታፊ ኢቻሹ ካዎቲ ኩገዲዶሶና። ኢሶይ ሃዒ ጋካናው ሃሬሰ፤ ሃንኮ ካዎይ ዪቤና። ኢ ዪዲ ጉላ ዎዴ ታካናው ቤሴሰ። 11 ሲንሌ ዳዒዳ ደዓይ፥ ሃዒ ባይናይሲ፥ ኢ ባ ሁዔን ሆሰቸገላ ደዓ። ኢ ላፑን ደዓታፔ ኢሱዎ፤ ኢ ቆያናው ቤሰ።

12 ኔኒ ቤዒዳ ታሙ ካጩቲ ሃር ደሚቦና ታሙ ካዎታ። ሺን ኤገቲ ደዓራ ኢሲፊ ኢሲ ሳቲ ካዎቲዲ ሃራናው ኤገታው ማቲ ኢሜታና። 13 ኤገታ ኡባሰ ኢሲ ቆፋይ ዳዒሰ፤ ኤገቲ ባገታ ዎልቃኔ ባገታ ማታ ደዓሰ ኢማና። 14 ኤገቲ ዶርሳራ ኦሌታና፥

17:1 ኤር 51:13 17:2 አሳ 23:17፤ ኤር 51:7 17:3 ዮ.ቆ 13:1
17:4 ኤር 51:7 17:8 ዳኔ 7:7፤ ዮ.ቆ 11:7፤ ማዝ 69:28 17:12 ዳኔ 7:24

ሺን ደርሳይ ጎዳታ ጎዳኔ ካዎታ ካዎ ጊዲያ ጊሾ ኢ ፀጊዲደሳቲ፣ ደሪዲይሳቲኔ አማኔቲዲይሳቲ ሄ ካዎታ ያናና» ያገሰ።

15 ኪታንቾይ ቃሲካ ታኮ፣ «ላይማቲያራ ኡቲዳ ሄ ኔኒ ቤዒዳ ሃፋቲ ያራታ፣ ካዎቲፋታ፣ ዜሬፋታኔ ዲማ ዲማ ደናን ኦዴቲይሳታ።

16 ቃሲ ኔኒ ቤዒዳ ታሙ ካጩይኔ ደዓይ ላይማቲያር ኢፃና። ኤንቲ ኢው ዴዒያ ኡባባ ኤካና። ቃሲ ኢዮ ካሎ አሻናኔ ኢ አሹዋ ሚዲጋና፤ ያቲዲ ኤንቲ ኢዮ ታማን ፀጋና።

17 ሂዛ፣ ያሳ ቃላይ ፖሌታና ጋካናው ኤንታ ቆፋይ ኢሲኖ ጊዲና ሚላ ኤንቲ ባንታ ኣይሲያ ዋልቃ ደዓሰ አማናዳኔ ያሳይ ቆፐዲይሳ ኤንቲ ኦፋናዳ ኤንታ ዋዛናን ያሳይ አዋ ዋሊሰ።

18 ሄ ኔኒ ቤዒዳ ማጫሲያ ሳዓ ካዎታ ሃሪያ ገታ ካታሚው» ያገሰ።

18

ባቢሎኔ ኩንዳፋ

1 ያቲዲ፣ ገታ ማቲ ደዒያ ሃራ ኪታንቾይ ሳሎፔ ዋዲሺን ታ ቤዓሰ። ሄ ኪታንቾዋ ቦንቾይ ሳዓ ፖዒሲሰ። 2 ሄ ኪታንቾይ ባ ቃላ ቶቁ ኦሊዲ፣

«ኢያ ኩንዳሱ! ገታ ባቢሎኔይ ኩንዳሱ!

ባቢሎኔይ ቱና ኣያናቲ አቁያ ቤሲ ገዲሱ።

ዲማ ዲማ ኢታባታሰ ኬሌ ገዲሱ፤

ቱና ካፎቲኔ ደዓቲ ሼምፒያ ቤሲ ገዲሱ።

3 ኣሳ ዜሬሌ ኡባ ባ ላይማቲፋ ዋይኒያ ኡሻሱ።

ሳዓ ካዎቲ ኢራ ላይማቲዶሶና።

ኢ ሚኮቲፋፌ ዴንደይሳን

ቢታን ዴዒያ ዛልዓንቾቲ ዲሬቲዶሶና»

ያገሰ።

4 ሄሳፌ ጉዬ፣ ታ ሳሎፔ ሃይሳዳ ያጊያ ሃራ ቃላ ሲዓሰ።

«ኢ ናጋራ ኢራ ኮዖና ሚላኔ፣

ኢያ ኤካናው ዴዒያ ሴራ ሂንቲ ኤኮና ሚላ፣

ታ ዴሪያው ኢፔ ኬዱቲ።

5 ሂዛ፣ ኢ ናጋራይ ሳሎ ጋካናው ደሬቲሰ።

ያሳይ ኢ ናቁዋ ኣኬሲሰ።

6 ኢያ ኢሚዲይሳ ሚላ ዛሪዲ ኢው ኢሚቲ።

ኢያ ኦሊዳ ኦሱዋሰ ናምዑ ኩሼ ኢው ዛሪቲ።

18:2 ኢሳ 21:9፤ ኤር 51:8፤ ዮ.ቆ 14:8፤ ኢሳ 13:21፤ ኤር 50:39 18:3 ኢሳ 23:17፤ ኤር 51:7 18:5 ሜዴ 18:20

ኢያ ገሊሲዳ ኡሻ ቦላ ሂንቴ ናምዑ ኩሼ ማለያ ኡሻ ኢ ፀዓን ኩንሳቴ።

7 ኢያ ቦንቸቲዳይሳዳኔ ኢው ኢንጃቲዳይሳ ሜላ፡ ኢዮ ሜቶሲቴኔ ካዮዪቴ።

ኢያ ባ ዋዛናን፡ ታኒ ካዌዳ ኡታሰ፤ ታ ኣዚኒ ባይና ማጫሰ ገዲኬ፤ ታኒ ኡባካ ካዮቴኬ) ያጋሱ።

8 ሄሳ ገሾ፡ ቦሻ ኡባይ፡ ሃርጌይ፡ ካዮይኔ ኩሺ ኢዮ ኢሲ ጋላሰ ኦይካና። ቃሲ ኢያ ታማን ፀጌታና፤ ኣይሰ ገኮ፡ ኢ ቦላ ፒርዲያ ያሳይ ዋልቃማ»

ያገሱ።

9 «ኢራ ላይማቲዳይሳቴኔ ኢ ሚኮቴላን ዳዒዳ፡ ኣላሚያ ካዎቲ ሄ ካታሚያ ፀጌቲን ኬያ ጨያ ቤዒዳ ዋይ ኢው ዋሲዲ ዬካና።

10 ኤንቲ ሄ ካታሚ ዋያ ቤዒዲ ያዪዳ ገሾ ሃኪ ኤቂዳ፡ ሳሃ ጌታ ካታሚ! ዋልቃማ ካታሚ!

ባቢሎኔ፡ ኔና ኣዬ!

ኔኒ ኢሲ ሳቴ ገደን ኔ ፒርዳ ኤካዳሳ) ያጋና።

11 «ኤንታ ማርካቢያ ጫና ሂዛፔ ሻሚያ ኣሲ ባይና ገሾ ሳዓን ዳዒያ ዛልዓንቸቲ ሄ ካታሚሰ ዋሳናኔ ካዮታና። 12 ኤንታ ዋርቃ፡ ቢራ፡ ቦንቸ ሹቻ፡ ኢንቆ ገያ ኣልዎ ሹቻ፡ ካሎሴ ማዎ፡ ሊኖ ማዎ፡ ሃራ ማዎ፡ ዘዎ ማዎ፡ ዲማ ዲማ ሳዎ ሚላ፡ ዛሌ፡ ኣልዎ ሚላ፡ ናሴ ቢራታ፡ ጎሌ ሹቹ፡ 13 ቃራፋ፡ ቂማሚ፡ ኢፀኔ፡ ካርቤ፡ ሺቶ፡ ዋይኔ፡ ዛይቴ፡ ሊቆ ጳሌ፡ ገሰቴ፡ ሜሄ፡ ደርሴ፡ ፓራ፡ ፓራ ጋሬ፡ ኣይሌታኔ ሃራ ኣሳታ ሻሚያ ኦኒካ ባዋ።

14 «ዛልዓንቸቲ ማጫሴኮ፡ ሳኒ ኣሞቲዳ ሎዎባ ኡባይ ኔፔ ጳይሰ። ኔ ኣቆይኔ ኣሌቂቲዳባ ኡባይ ኔፔ ሃኪሰ። ኔኒ ዛራዳ ኤንታ ኡባ ዳማካ) ያገደሶና። 15 ሄ ካታማን ዛልዒዲ ዲሬቲዳ ዛልዓንቸቲ ኢ ሜቱዋ ባቢዲ ኢፔ ሃኪዲ ኤቃና። ኤንቲ ዬካናኔ ካዮታና። 16 ቃሲ፡

ሳሊኖ ማዎ፡ ካሎሴ ማዎኔ ዘዎ ማዎ ማዒዳ፡ ዋርቃን፡ ቦንቸ ሹቻኒኔ ኢንቆ ገያ ኣልዎ ሹቻን ኣሌቂቲዳ፡ ሄ ጌታ ካታሚሰ ኣዬ! 17 ሃይሳ ሜላ ጌታ ሻሎ ኡባይ ኢሲ ሳቴ ገደን ጳይሰ) ያገደሶና።

18:6 ማዝ 137:8፤ ኤር 50:29 18:8 ኢሳ 47:7-9 18:9 ሃዝ 26:16-17
18:11 ሃዝ 27:31 18:12 ሃዝ 27:12፣ 13፣ 22 18:15 ሃዝ 27:31

«ማርካቢያ ላገያ ኡባይ፣ ማርካቢያን ቢያ ኡባይ፣ ማርካቢያ ቦላ ኡሊያ ኡባይኔ ኣባን ዛልዒያ ኡባይ ሃኪ ኤቂደሶና። 18 ሄ ካታሚያ ፀጌትን ኬያ ጩያ ቤዒዳ ዎዴ ላሃ ጌታ ካታሚው ዳኒያ ሃራ ካታሚ ዴዒሻ?» ያገደሶና። 19 ኤንቲ ባንታ ሁዔን ባና ቆሊዲ፣ ዋሲደሶናኔ ካዮቲደሶና።

ላኣባ ቦላ ማርካቤቲ ዴዒያ ኡባይ፣

ኢ ሻሉዋን ዴሬቲዳ ኡባይ፣

ሄ ካታሚያ ኢሲ ሳቲን ቆዩዳ ገሾ

ኣዬ! ኣዬ!

20 ሳሉዋው፣ ኢ ቆዩዋን ኡፋይታ!

ጌሻቶ፣ ሃዋሬቶ፣ ናቤቶ፣

ዶሳይ ሂንቲ ገሾ ኢ ቦላ ፐርዲዳ ገሾ ኡፋይቲቲ።» ያገደሶና።»

21 ያቲን፣ ሚና ኪታንቾይ ዎፃ ዳኒያ ጌታ ሹቹ ዴንሊዲ ኣባን ሆሊሹ፣ «ጌታ ካታሚያ ባቢሎኔይ ዎልቃን ሆሌታዳ ሃይሳዳ ኩንዳና፤ ኢያ ሃቺፌ ጉዬ ኡባካ ቤንቲኩ። 22 ዲሊ ዲጃይሳቲኔ ዩጃይሳቲ፣ ሱሱልዔኔ ዎይዜ ፑኔይሳቲ፣ ሂዛፔ ጉዬ ኔ ገደን ኡባካ ሲዔቶኮና። ኣይ ኮቻ ዛልዔ ዛልዒያ ኣሲካ ኔ ገደን ቤንቲና። ዎፃ ገርሲ ሂዛፔ ጉዬ ኔ ገደን ሲዔቲና። 23 ያዎፔ ፖዶይ ዛሪዲ ኔ ገደን ፖዔና። ማቾ ኤኬይሳኔ ኣዚና ጌሊያሪ ቃሊ ሂዛፔ ጉዬ ኔ ገደን ሲዔቲና። ኔ ዛልዒንቾቲ ቢታ ኡባን ኤሬቲዳ ዎልቃማታ። ኔ ቢታን ካዎቲላታ ኡባ ጩማዳሳ» ያገሰ።

24 ናቤታ ሱላይ፣ ጌሻታ ሱላይኔ ቢታ ቦላ ሃይቂዳ ኣሳ ኡባ ሱላይ ኢ ገደን ቤንቲዳ ገሾ ባቢሎኔይ ፐርዴታሱ።

19

1 ያቲን፣ ሳሎን ዳር ኣሳይ፣

«ዶሳይ ጋላቲቶ!

ኣቶቲላይ፣ ቦንቾይኔ ዎልቃይ ኑ ዶሳስ ገደ።

2 ኢያ ፐርዲይ ቲማኔ ዒሎ።

ሳዒ ቱኒሲዳ ኢታ ላይሚው ዶሳይ ፐርዲሰ።

ዶሳይ ባ ኣይሌታ ሱላ ኢፔ ኣቺሰ»

18:17 ኢሳ 23:14፤ ሂዛ 27:26 18:18 ሂዛ 27:32 18:20 ሂዛ 27:30፤ ዛሬ 32:43፤ ኤር 51:48 18:21 ኤር 51:63 18:22 ኢሳ 24:8፤ ሂዛ 26:13 18:22 ኤር 7:34፤ 25:10 18:24 ኤር 51:49

ያገሺን ሲዓሰ።

3 ሄ አሳይ ዛሪዲ ባንታ ቃላ ቋቁ ኦሊዲ፤

«ዖሳ ጋላቲ ጋኮ።

ሄ ካታሚያ ሜሪናው ጩያሽ ዳና»

ያገደሶና።

4 ላታማኔ ኦይዲ ጩማቲኔ ዴያን ዴዲያ ኦይዲ ሜዴቴላቲ አራታን ኡቲዳ ዖሳሰ ጉፋኒዲ፤

«አሚንዲ! ዖሳ ጋላቲ ጋኮ»

ያገዲ ጎይኒደሶና።

5 ያቲን፤

«ዖሳ አይሌቲ፤

ዖሴ ያያ ጉላኔ ገቲ ኡባይ፤

ኑ ዖሳ ጋላቲቱ»

ያገያ ቃላይ አራታፔ ኬዩሰ።

6 ያቲን፤ ዳር አሳዳ ዎጫሚያ፤ ዎልቃማ ሻፋዳ ጉሚያ፤ ዳዳዳ ዴቺያ ገርሳይ፤

«ዖሳ ጋላቲ ጋኮ፤

ኑ ጎዳይ፤ ኡባፌ ዎልቃማ ዖሳይ ካዎቲሰ።

7 ዶርሳ ያጋኖይ ጋኪዳ ገሽኔ ኢያ ጌሊያራ ገዢዳ ገሾ

ኑ ኡፋይቶሰ፤ ጋላቶሴኔ ዶርሳ ቦንቾሰ።

8 ጌሎሰ ገዢዳራ ጳሊያኔ ጌሽ ገዲዳ

ሊኖ ማዖ ማዓና ሜላ ኢው ኢሚቲሰ»

ያገሺን ታ ሲዓሰ። (ሊኖ ማዖይ ጌሻታ ጂሎ ኦሶ ለሚሶ።)

9 ሄሳፌ ጉዬ፤ ኪታንቾይ ታኮ፤ «ዶርሳ ያጋኑዎ ጃጌቲዳይሳቲ አንጃቲዳይሳታ» ጋዳ ፃፋ። ሄ ኪታንቾይ ጉጂዲ፤ «ሃይሲ ዖሳ ቱማ ቃላ» ያገሰ።

10 ሄ ዎዳ ታ ኢያ ጎይናናው ኢያ ቶሁዎ ቦላ ኩንዳሰ። ሺን ኢ፤ «ሄሳ ኦሶፋ! ታኒ ዬሱሳባ ማርካቲያ ኔ ሜላኔ ኔ ኢሻታ ሜላ።

ኔ ዖሳ ጎይና» ያገሰ። ሂዛ፤ ዬሱሳባ ማርካቲዳይሳታሰ ናቤቴላ አያኒ ዴዴሰ።

ቦላ ፓራ ቶጊዳይሳ

11 ያቲን፤ ሳሎይ ዶዬቲን፤ ያን ቦላ ፓሪ ዴዴይሳ ቤዓሰ። ሄ ፓራ ቶጊዳይሲ አማኔቲዳይሳኔ ቱማንቾ ጌቴቴሰ። ኢ ጂሎቴላን ፐርዴሴኔ ኦሌቴሰ።

12 ኢያ አይፌይ ታማ ላጮ ዳኔሰ፤ ኢያ

19:2 ዛሬ 32:43፤ 2ካዎ 9:7 19:3 ኢሳ 34:10 19:5 ማዝ 115:13
19:6 ሂዛ 1:24፤ ማዝ 93:1፤ 97:1፤ 99:1 19:9 ማቶ 22:2 19:11
ሂዛ 1:1

ሁዔን ዳሮ ካላቸ ዳዔስ። ኢያ ቦላ ኢ ኣቲን ሃሪ ኦኒካ ኤሮና ፃፊቲዳ ሱንሳ ዳዔስ። 13 ኢ ሱላን ሙኬቲዳ ማዖ ማዒስ፤ ኢያ ሱንሳይካ ያሳ ቃለ። 14 ጳሊያኔ ጌሺ ጊዲዳ ሊና ማዖ ማዒዳ ሳሎ ኦላንቸቲ ቦላ ፓራታ ቶጊዲ ኢያ ጌዶ ካሎሶና። 15 ካዎቲላታ ቃንዲያ ማሺ ኢያ ደናፔ ከዬስ። ኢ ቢራታ ፃምዓን ኣሳ ሃራና። ኡባፌ ዎልቃማ ያሳ ሃንቆ ዎይኔ ኡሻ ጉምዒያ ቤሳ ኢ ዬቆና። 16 ኢያ ማዑዎ ቦላኔ ኢያ ዎዲሪያ ቦላ፡ «ካዎታ ካዉዎኔ ጎዳታ ጎዳ» ያጊያ ሱንሳይ ፃፊቲስ።

17 ሄሳፌ ጉዬ፡ ኢሲ ኪታንቸይ ኣዎ ቦላ ኤቂዳይሳ ቤዓስ። ሄ ኪታንቸይ ሳሎፕ ፒራዲያ ካፎ ኡባስ ባ ቃላ ቶቁ ኦሊዲ፡ «ሃ ዪቴ! ያሳ ጊቢራ ማናው ኢሲ ቤሲ ሸቁቲ። 18 ዪዲ ካዎታ ኣሹዎ፡ ሻላቃታ ኣሹዎ፡ ዎታዳሬታ ኣሹዎ፡ ፓራታ ኣሹዎ፡ ፓራታ ቶጊይሳታ ኣሹዎ፡ ኣሳ ኡባ ኣሹዎ፡ ኣይሌታ ኣሹዎ፡ ዎማናታ ኣሹዎ፡ ጊታታኔ ጉላታ ኣሹዎ ሚቲ» ያጊስ።

19 ደዓይ፡ ፓራ ቶጊዳይሳራኔ ኢያ ኦላንቸታራ ኦሌታናው ሳዓ ካዎቲኔ ኤንታ ኦላንቸቲ ኢሲ ቤሲ ሸቁዳሽን ቤዓስ። 20 ሺን ሄ ደዓይኔ ኢያ ሱንሳን ማላታታ ኦሊዳ ዎርዶ ናቤይ ኢያራ ኢሲፌ ኦይኬቲስ። ሄ ማላታታን ደዓ ማላይ ዳዔይሳታኔ ኢያ ሚሲሊያ ጎይኔይሳታ ኢ ባሌሊስ። ደዓይኔ ዎርዶ ናቤይ ናምዓይካ ዲኔን ኤዲያ ታማ ኣባን ፓፃ ዩጌቲዶሶና። 21 ኣቲዳይሳቲ ፓራ ቶጊዳይሳ ደናፔ ከያ ማሻን ሃይቂዶሶና። ካፎቲ ኡባይ ኤንታ ኣሹዎ ሚዲ ካሊዶሶና።

20

ሙኩሉ ላይሊ

1 ዛዎ ባይና ኦላ ቁልፒያኔ ጊታ ሳንሳላታ ባ ኩሸን ኦይኪዳ ኢሲ ኪታንቸይ ሳሎፕ ዎዲሸን ቤዓስ። 2 ኢ ዳዎያ ኦይኪዲ ሙኩሉ ላይላስ ቃቸስ። ሄ ዳዎይ ኮይሮ ሾሻ፡ ዳቡሎሳ ዎይኮ ፃላሄ። 3 ኪታንቸይ ዛዎ ባይና ኦላን ኢያ ዩጊዲ፡ ሙኩሉ ላይሊ ዉራና ጋካናው ካዎቲላታ ዛሪ ባሌላና ሚላ ቁልፒን ጎርዲዲ ኣታሚስ። ሄሳፌ ጉዬ፡ ዳዎይ ጉላ ዎደስ ቢሌታናው ቤሴስ።

4 ሄሳፌ ጉዬ፡ ኣራታታኔ ኣራታታ ቦላ ኡቲዲ ፒርዳና ሚላ ማቲ ኢሜቲዳይሳታ ቤዓስ። ዬሱሳስ ማርካቲዳ ጊሾኔ ያሳ ቃላ

19:12 ዳኔ 10:6 19:15 ማዝ 2:9፤ ኢሳ 63:3፤ ኢዩ 3:13፤ ዮ.ቆ 14:20
 19:17 ሃዝ 39:17-20 19:20 ዮ.ቆ 13:1-18 20:2 ሜዴ 3:1

ኦዲዳ ጊሾ ባንታ ቆጂያ ጎይሬቲዳ አሳ ሽምጥባ ቤዓሰ። ኤንቲ ደዓ ዎይኮ ደዓ ሚሲሊያ ጎይኒቦኮና። ኤንቲ ደዓ ማላ ባንታ ሶምዎን ዎይኮ ባንታ ኩሼን ዎሊቦኮና። ኤንቲ ሃይቆፔ ዴንዲዲ ኪሪሰቶሳራ ኢሲፌ ሙኩሉ ላይሊ ሃሪደሶና። ⁵ ሃይሲ ኮይር ዴንዲዎ፤ አቲዳ ሃንኮ ሃይቁዳይሳቲ ሙኩሉ ላይላይ ወራና ጋካናው ሃይቆፔ ዴንዲቦኮና። ⁶ ኮይር ዴንዲዎሰ ቃዲ ዴዔይሳቲ አንጄቲዳይሳታኔ ጌሻታ። ኤንታ ቦላ ናምዓንሉ ሃይቁዋሰ ዎልቁ ባዎ። ኤንቲ ያሳሲኔ ኪሪሰቶሳሰ ካሂኔ ጊዳና፤ ኢያራ ኢሲፌ ሙኩሉ ላይሊ ሃራና።

ፃላሂያ ያኔቴላ

⁷ ሙኩሉ ላይላይ ወሪዳፔ ጉዬ ፃላሂይ ቃሾፔ ቢሌታና። ⁸ ኢ ሳዓ ጋፃፔ ጋፃ ጋካናው ዴዔያ ካዎቴላታ፣ ኤንቲካ፣ ጎጌኔ ማጎጌ ጌቴቴይሳታ ባሌሊዲ ኦላሰ ሺሻናው ኬያና። ኤንታ ፓይደይ አባ ጋፃን ዴዔያ ሻፌ ማላ። ⁹ ኤንቲ ቢታ ኡባን ላሌቲዲ፣ ጌሻታ ሄራኔ ያሳይ ደሲያ ካታማ ቴቂደሶና። ሺን ታሚ ሳሎፔ ዎጂዲ ኤንታና ሚሰ።

¹⁰ ኤንታ ባሌሊዲ ፃላሂይ፣ ደዓይኔ ዎርደ ናቤይ ዬጌቲዳ ኤዔያ ዲኔ ታማ አባን ዬጌቲሰ። ኤንቲ ቃማኔ ጋላሰ ሜሪናው ፓፃ ካዔታና።

ወርሴላ ፒርዳ

¹¹ ሄሳፌ ጉዬ፣ ጌታ ቦላ አራታ ቦላ ኡቲዳይሳ ቤዓሰ። ሳዒኔ ሳሎይ ኢያ ሲንሳፌ ባቃቲደሶና፤ ኤንቲ ዛሪ ቤንቲቦኮና። ¹² ሃይቁዳይሳቲ፣ ጌታቲኔ ጉላቲ አራታ ሲንሳን ኤቁዳይሳታ ቤዓሰ፤ ማፃፋቲ ደዬቲደሶና፤ ቃሲ ዴፃ ማፃፋ ጊዲዳ ሃራ ማፃፌ ደዬቲሰ። ሃይቁዳይሳቲ ማፃፋን ፃፌቲዳ ባንታ ኦሱዎዳ ፒርዳ ኤኪደሶና። ¹³ አባይ ባ ጊደን ዴዔያ ሃይቁዳይሳታ አሚሰ፤ ሃይቆይኔ ሲፃሌይ ባንታ ጊደን ዴዔያ ሃይቁዳይሳታ አሚደሶና። ኢሲ ኢሲ አሲ ባ ኦሱዎዳ ፒርዳ ኤኪሰ። ¹⁴ ያቲን፣ ሃይቆይኔ ሲፃሌይ ታማ አባን ዬጌቲደሶና። ሄ ታማ አባይ ናምዓንሉ ሃይቆ። ¹⁵ ዴፃ ማፃፋን ኢያ ሱንላይ ፃፌቲቦና ኦኒካ ታማ አባን ዬጌቲሰ።

21

ኦራላ ሳሎኔ ኦራላ ሳዓ

1 ታኒ ኦራላ ሳሎኔ ኦራላ ሳዓ ቤዓስ። ኮይሮ ሳሎይኔ ኮይሮ ሳዓይ ሳይስ፤ አባይካ ሳይስ። 2 ጌሻ ካታሚያ፡ ኦራላ ዬሩሳላሜይ፡ ኣዚና ጌላናው ኣሌቁታዳ ጊጋዳ ዳዒያ ማጫሳዳ ሳሎፕ ያሳ ማታፕ ዱጌ ዋዲሺን ቤዓስ።

3 ኣራታፕ ሃይሳዳ ያጊዲ፡ ኦዲያ ጊታ ቃላ ሲዓስ፤ «ያሳ ከላይ ኣሳራ ዳዔስ፤ ያሳይ ባ ቦንቹዋራ ኣሳራ ኢሲፌ ዳና። ኤንቲ ኢያ ዳሬ ጊዳና፤ ያሳይ ባ ሁዔን ኤንታራ ዳና፤ ኢ ኤንታ ያሳ ጊዳና።

4 ያሳይ ኤንታ ኣይፌፕ ኣፋላ ኡባ ቁቻና። ሂዛፕ ሃይቆይ ዋይኮ ካዮይ ዋይኮ ዋሶይ ዋይኮ ዋይኮ ዳና። ጋልዓ ኡባይ ኣዲስ» ያጊስ።

5 ኣራታ ቦላ ኡቲዳይሲ፡ «ታኒ ኡባ ኦራሊ ኦላና» ያጊስ። ቃሲ ዛሪዲ ታኮ፡ «ታኒ ኦዳይሲ ኣማንሌይሳኔ ቱማ ጊዲያ ጊሾ ዓፋ» ያጊስ። 6 ቃሲ ታኮ፡ «ፖሌቲስ! ታኒ ኣልፋኔ ኣሜጋ፤ ደሜሊኔ ፖሎ። ሳሞቲዳ ኦናካ ዳዖ ሃላ ፕልቱዋሬ ጪጊ ባይና ጮ ኡሻና። 7 ያኒያ ኦኒካ ሄሳ ኡባ ላታና፤ ታኒ ኢያው ያሳ ጊዳና፤ ኢካ ታ ናዓ ጊዳና። 8 ሺን ያሻንቸታ፡ ኣማኔቶናይሳታ፡ ቱናታ፡ ሸምፖ ዋዲይሳታ፡ ላይማቲይሳታ፡ ቢቲይሳታ፡ ኤቃ ሳይኔይሳታኔ ዋርዳንቸታ ቃዳይ ዲኔይ ኤዲያ ታማ ኣባን ጊዳና። ሄሲ ናምዓንሉ ሃይቆ» ያጊስ።

9 ላፑን ዉርሴላ ቦሻቲ ኩሚዳ ላፑን ፀዓታ ኦይኪዳ ላፑን ኪታንቸታፕ ኢሶይ ታኮ ዪዲ፡ «ሃያ፡ ታኒ ኔና ጌሎስ ጊጊዳ ደርሳ ማቸው ቤሳና» ያጊስ። 10 ኪታንቸይ ታና ዳሮ ዶቃ ዳሪያ ሁዔ ጌሻ ኣያናን ኬሲዲ፡ ጌሻ ካታማይ፡ ዬሩሳላሜይ፡ ሳሎፕ ያሳ ማታፕ ዱጌ ዋዲሺን ቤሲስ። 11 ሄ ካታማይ ያሳ ቦንቸን ፖዔስ። ሄ ካታማ ፖይይ ያስጲዳ ጊያ ኣልዖ ሹቻ ማላ፤ ጌሻ ቢሪሌዳ ጸሌስ። 12 ሄ ካታማ ዲርሳይ ዋልቃማኔ ኣዲሴ። ኢያው ታማኔ ናምዑ ፔንጌቲኔ ሄ ፔንጌታ ናጊያ ታማኔ ናምዑ ኪታንቸቲ ዳዖሶና። ፔንጌታ ቦላ ታማኔ ናምዑ ኢስራዔሌ ዜራላታ ሱንላይ ዓፌቲስ። 13 ደሎሃ ባጋራ ሄቩ ፔንጌቲ፡ ፑዳሃ ባጋራ ሄቩ ፔንጌቲ፡ ዱጌሃ ባጋራ ሄቩ ፔንጌቲ፡ ዉሎሃ ባጋራ ሄቩ ፔንጌቲ ዳዖሶና። 14 ካታማ ጊምቤ ዲርሳይ ታማኔ ናምዑ ሹቻ ባሶታ

21:1 ኢሳ 65:17፤ 66:22፤ 2ጴ፯ 3:13 21:2 ኢሳ 52:1፤ ዮ.ቆ 3:12፤ ኢሳ 61:10 21:3 ሂዝ 37:27፤ ሉዌ 26:11 21:4 ኢሳ 25:8፤ ኢሳ 35:10፤ 65:19 21:6 ኢሳ 55:1 21:7 2ሳሙ 7:14፤ ማዝ 89:26 21:10 ሂዝ 40:1 21:12 ሂዝ 48:30-35

ቦላ ኤቂስ። ኤንታ ቦላ ታማኔ ናምዑ ደርሳ ሃዋሬታ ሱንላይ ፃፈተሰ።

15 ታው ኦዲያ ኪታንቹዋስ፣ ካታማ፣ ኢያ ፔንጌታኔ ኢያ ደርሳ ዋዲያ ዋርቃ ፃምዓይ ዳዔስ። 16 ካታማስ ኦይዲ ማዘኔቲ ዳዖሶና፤ ካታማ ጌሳይኔ ጎምፓይ ኢሲ ገና። ኪታንቹይ ካታማ ባ ፃምዓን ዋዲን፣ ካታማይ ታማኔ ናምዑ ሙኩሉ ኪሎ ሚቲሬ ገዲሰ፤ ካታማ ጌሳይ፣ ጎምፓይኔ ዶቃቴላይ ኢሲ ገና። 17 ኪታንቹይ ቃሲ ደርሳ ዋዲን፣ ኪታንቹይ ጎዔቲያ ኣሳ ኩሼን ኢሲ ፃታኔ ኦይታማኔ ኦይዲ ዋዳ ገዲሰ።

18 ካታማ ደርሳይ ያሰጺዴ ገያ ሹቻን ዲሬቲሰ። ካታማይ ማሰቶቲዳ ጳሊያ ጌሻ ዋርቃን ኦሴቲሰ። 19 ካታማ ደርሳ ባሶይ ኡባ ቆዋ ቦንቹቲዳ ሹቻን ኣሌቄቲሰ። ኮይር ሂፃቲዳ ሹቻይ ያሰጺዴ፣ ናምዓንላይ ሳምፔሬ፣ ሄቫንላይ ኬልቄዶኔ፣ ኦይዳንላይ ባሉሬ፣ 20 ኢቻሻንላይ ሳርደንኪሴ፣ ኡሱፑንላይ ሳርዲዮኔ፣ ላፑንላይ ኪሪሰቲሎቤ፣ ሆሰፑንላይ ቢሪሌ፣ ኡዲፋንላይ ቶጳዚዮኔ፣ ታማንላይ ኪሪሰጺራሲሴ፣ ታማኔ ኢሲንላይ ያኪንቴ፣ ታማኔ ናምዓንላይ ኣሚቴሰዲኖሴ።

21 ታማኔ ናምዑ ፔንጌታስ ታማኔ ናምዑ ኣንቆ ገያ ኣልዖ ሹቹ ዳዔስ። ኢሲ ኢሲ ፔንጌይ ኢሲ ኣንቆን ኦሴቲሰ። ካታማ ዋጋ ኦጌይ ማሰቶቲዳ ጳሊያ ጌሻ ዋርቃፌ ኦሴቲሰ።

22 ጎዳይ፣ ኡባፌ ዋልቃማ ያሳይኔ ደርሳይ ካታማስ ኬሌ ገዲያ ገሾ ታ ሄ ካታማን ያሳ ኬሌ ቤዓቢኬ። 23 ያሳ ቦንቹይ ሄ ካታማስ ፖዒያ ገሾኔ ደርሳይ ኢያው ያምፔ ገዲያ ገሾ ካታማስ ኣዋ ዋይኮ ኣጌና ፖዖ ኮሼና። 24 ካዋቴላቲ ሄ ካታማ ፖዖን ሃሙታና፤ ካዋቲካ ባንታ ቦንቹዋ ያ ኤሃና። 25 ቃሚ ያን ባይና ገሾ ካታማ ፔንጌቲ ኡባ ዋዴ ደያ ገዳና፤ ጎርዴቶኮና። 26 ካዋቴላታ ጌታቴላይኔ ቦንቹይ ሄ ካታማ ያና። 27 ደርሳ ዴዖ ማፃኣን ሱንላይ ፃፈቲዳይሳታ ፃላሊ ኣቲን ቱናባ ዋይኮ ዬላያባ ኣሌይ ዋይኮ ዋርዶቲይ ኦኒካ ሄ ካታማ ጌሌና።

22

1 ያቲዲ፣ ኪታንቹይ ታና ያሳ ካዋቴላ ኣራታፔኔ ደርሳ ካዋቴላ

21:15 ሃዝ 40:3 21:21 ኢሳ 54:11-12 21:23 ኢሳ 60:19 21:24 ኢሳ 60:3 21:25 ኢሳ 60:11 21:27 ኢሳ 52:1፤ ሃዝ 44:9

አራታፔ ጎጊያ ማስቶቴዳ ጰሊያ ዴያ ሃላ ሻፋ ቤሲስ። 2 ሄ ሻፋይ ካታማ ኦጊያ ጊድራ ዱጌ ጎጊስ። ሻፋፔ ሄፊንላ ባጋራኔ ሃፊንላ ባጋራ ኣጌናን ኢሲ ቶሆ፤ ላይላን ታማኔ ናምዑ ቶሆ አይፊያ ዴያ ሚሊ ዴዴስ። ሄ ሚላ ቦንጮይ ካዎቴላታ ኡባ ሃርጌፊ ፓሌስ።

3 ሄ ካታማን አይቢ ቃንጌሊካ ዴና። ያሳ ካዎቴላ አራታይኔ ደርሳ ካዎቴላ አራታይ ሄ ካታማን ዳና። ያሳ አይሌቲ ያሳስ ኦላና። 4 ኤንቲ ኢያ ሰምዑዎ ቤዓና፤ ኢያ ሱንላይ ኤንታ ሰምዖን ያፌታና። 5 ሂዛፔ ቃሚ ዴና፤ ጎዳ ያሳይ ኤንታው ያምፔ ጊዲያ ጊሾ ኤንታው ያምፔ ዎይኮ አዎ ፖዖ ኮሼና። ኤንቲ ሜሪ ሜሪናው ካዎታና።

ዬሱሳ ዩሳ

6 ኪታንቾይ ታኮ፡ «ሃ ታ ኦዲያ ቃላይ ቱማኔ አማንሌይሳ። ጎዳይ፡ ናቤታ ባ ጌሻ ኣያናን ኪቲያ ያሳይ፡ ማታን ሃናናባ ባ አይሌታ ቤሳናው ባ ኪታንቾዎ ኪቲስ» ያጊስ። 7 ዬሱሲ፡ «ሄኮ ታ ኤሌሳዳ ያና፤ ሃ ማፃፋን ዴዲያ ቲንቢቲ ቃላ ናጊያ ኦኒካ ኣንጃቲዳይሳ» ያጊስ።

8 ታኒ፡ የሃኒሲ፡ ሄ ኡባባ ሲዓስ፤ ቤዓስ። ታኒ ሄሳ ሲዒዳ ዎዴኔ ቤዒዳ ዎዴ ሄሳ ታና ቤሲዳ ኪታንቾዎ ጎይናናው ኢያ ቶሁዎ ቦላ ኩንዳስ። 9 ሺን ኪታንቾይ ታኮ፡ «ሄሳ ኦሶፋ! ታኒ ኔዳ፡ ናቤታዳ ኔ ኤሻታዳኔ ሃ ማፃፋን ዴዲያ ኡባ ኪቲቲያ አይሌታ ሚላ፤ ያሳ ጎይና» ያጊስ።

10 ኪታንቾይ ዛሪዲ፡ «ሃ ኡባይ ፖሌቲያ ዎዴይ ማታቲዳ ጊሾ ሃ ማፃፋን ያፊቲዳ ቲንቢቲ ቃላ ማታሚን ጎርዶፋ። 11 ኢታ ኦሌይ ጉጂዲ ኢታ ኦሶ፤ ቱኔይ ጉጂዲ ቱኖ። ሎዖ ኦሌይ ጉጂዲ ሎዖ ኦሶ፤ ጌዬይ ጉጂዲ ጌዮ» ያጊስ።

12 ዬሱሲ፡ «ሄኮ፡ ታኒ ኤሌሳዳ ያና። ኢሱዋስ ኢሱዋስ ኢያ ኦሱዋዳ ኢማናው ታ ዎይቶይ ታራ ዴዴስ። 13 ታኒ አልፋኔ አሜጋ፤ ኮይርኔ ወርሴሊ፤ ዶሚሊኔ ፖሎ።

14 «ባንታ ማዑዎ ሜጪዲ ጌሼይሳቲ ኣንጃቲዳይሳታ። ዴያ ሚሌ አይፊያ ማናወኔ ካታማ ፔንጊያራ ጌላናው ኤንታው ማቲ ኢማቲስ። 15 ሺን ካናቲ፡ ቢቲይሳቲ፡ ላይማቲይሳቲ፡ ሸምፖ

22:1 ሃዝ 47:1፤ ዛካ 14:8 22:2 ሜዴ 2:9 22:3 ዛካ 14:10 22:5
ኢሳ 60:19፤ ዳኔ 7:18 22:11 ዳኔ 12:10 22:12 ኢሳ 40:10፤ 62:11፤
ማዝ 28:4፤ ኤር 17:10 22:13 ዮ.ቆ 1:8፣ 17፤ 2:8፤ ኢሳ 44:6፤ 48:12
22:14 ሜዴ 2:9፤ 3:22

ዎጂይሳቲ፣ ኤቃ ጎይኔይሳቲ፣ ዎርዶ ዶሴይሳቲኔ ኦፊይሳቲ ካሬን ዴዎሶና።

16 «ታኒ፣ ዩሱሲ፣ ሃ ማርካቴፋ ሂንቲው፣ ዎሳ ኬፋታሰ ኦዳና ማላ ታ ኪታንቸዎ ኪታሰ። ታኒ ዳዊቴ ሼሺኔ ዜሬፊ። ታኒ ፖዒያ ጉራ ባካላ» ያገሰ።

17 ጌሻ አያናይኔ ጌላናው ገጊዳ ማጫሲያ፣ «ሃያ» ያጎሶና። ቃሲ ሃይሳ ሲዒያ ኦኒካ፣ «ሃያ» ያጎ። ሳሞቲዳ ኦኒካ ሃዮ፤ ዴዎ ሃፋ ኮያ ኦኒካ ጮ ኤኮ።

18 ታኒ ሃ ማፃፋን ፃፊቲዳ ቲንቢቴ ቃላ ሲዒያ ኦናካ ዘራይሰ። ኦኒካ ሃ ቃላ ቦላ ኢሲባ ጉጂኮ፣ ያሳይ ሃ ማፃፋን ፃፊቲዳ ቦሻ ኢያ ቦላ ጉጃና። 19 ኦኒካ ማፃፋን ዴዒያ ቲንቢቴ ቃላፔ ኢሲባ ፓጪሲኮ፣ ያሳይ ሃ ማፃፋን ፃፊቲዳ ዴዎ ሚፋ አይፊያፔኔ ጌሻ ካታማፔ ኢያ ቃዳ ፓጪሳና።

20 ሃ ኡባ ማርካቴይሲ፣ «ቴማ፣ ታኒ ኤሌሳዳ ያና» ያገሰ። አሚንዒ፤ ጎዳ ዩሱሳ፣ ሃያ።

21 ጎዳ ዩሱሰ ኪሪሰቶሳ አጼ ኬሃቴፋይ ሂንቴ ኡባራ ገዶ። አሚንዒ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 21 Feb 2024 from source
files dated 29 Jan 2022
c35d6c73-3843-5482-b53e-7559d35deee5